

江陰縣志

卷二十七

十六冊

江陰縣志卷之二十七

藝文三

賦

大江賦

明 薛章憲

渺大江之西來浩百川之東走
螻蛄蜿蜒蛟虬蚴蚪源發
於峨眉匯會於峴首沃遙天兮
欲浮劃大地兮若剖夾右
碣兮趨溟渤揚左蠡兮灌澤藪
始生於一終成於九三峽
倒兮呂梁懸百川灌兮泰山溜
突兀駕空兮巨靈鼻屨鏗
旬觸石兮長鯨哮吼三百其名
三千其支起於濫觴入於
漏卮如諸侯會同不愆於儀如
萬馬奔軼不失其馳過九

江陰縣志

卷二十七

藝文賦

一

河兮傲海若冠四瀆兮侶馮夷
西至下雋東爲中江轉地
軸拍天杠汨混沌壓鴻龐醜爲
陂池怒爲濤瀧隨月盈縮
鎮日琤淙瀾漫澎湃震撼擊撞
鉄騎暉暉金鼓摐摐意恣
睢而益驕氣偃蹇而未降
蕞爾吾土截然居中式遄其歸
獨當其衝高墉屹兮如雲長隄
偃兮如虹旣攬其角而掎
其足亦扼其吭而搃其胸我有
餘守敵莫能攻於是解甲
迤邐投戈雍容然後洪舸餘艘
巨艦朦朧轉輸繹絡貿遷
通融駕萬斛兮南北候五兩兮
西東往來隨風倏忽轉電
長年謳歌黃頭舞抃日五彩兮
鎔金月一色兮如練南控
甌閩西通淮甸百貨坌集千艘
魚貫故夫家樂業民安居

操奇贏以懋遷擅沃饒而菑畚市三倍而利近畝一鍾而羨餘貲川通以埒封貨山積以儲胥陸處棟宇水行舳艫燕中唐兮陳趙舞棹中流兮發吳歛粵有美人湛然清矚仰視飛鳥俯玩遊魚臨清流以徜徉凌倒影而踟躕慨宇宙之寥廓悵日月之居諸乃歌曰川之渟泓思復吾本然之明川之淨虛思去吾舊染之污如曾點言志曰浴乎沂如子在川上曰逝者如斯夫苟徒知玩物而適情又何異乎淘河與雍渠

凌波閣賦

并引

薛章憲

方君孔章有平步煙霄之志而久未遂乃作飛觀於大

江陰縣志

卷二十七

藝文賦

二

江之濱黃山之麓命之曰凌波閣以舒嘯寄傲云浮休野人爲之賦曰

大江西來直下五千里繚百折而不迴洶湧奔騰而入海兮轟萬壑之驚雷馮夷海若掀舞噴薄鎮日夕而揮霍狂瀾滌迴巨浪喧豨屹雪山之崔巍爰有飛觀憑崖架壑薨棟孤鶩簷牙高啄寇平仲構無地之樓臺邵堯夫揭空中之樓閣霧雨溟濛兮蜃蛤噓氣而成雲波濤舂擊兮蜥蜴銜冰而吐雹於是目駭膽掉心動股栗晨光熹微如遊龍伯之宮寒氣凜凜恍入鮫人之室若乃朝日出兮躍金夕月吐兮浮玉霜橫空以垂練風吹漪而縹縠萬象隨感而

自生四時隨在而各足若使江倏變而爲春酒兮與君兩
舉醖而相屬

義城賦 并引

國朝 徐遵湯

夫義利之辨微矣哉乃生死之閑則其大閑也若必繩
以可以死可以無死其不胥汨於利者幾希江陰古名
利城乙酉之變困守者百餘日效死者萬餘人其品不
齊其歸則一卽未能成仁庶幾取義矣因擬改名義城
而爲之賦其辭曰

嗟此孤城枕於江皋潮回寂寞山共蕭條積骸成邱喋血
盈濠日星慘澹而宵昏霜霰陰零而晝漂羌擁愁於郊扃

江陰縣志

卷二十七

藝文賦

三

祇閉目塞耳以自逃當元枵之應躔茲用適夫曠野悵人
事之己非訊親串其逾寡睇荒墟以迴車攀枯樹而維馬
恍異域之蒼涼淚泫泫其傾瀉爾其龍蛇鬪牛馬風乾坤
改步江海飄蓬殺氣填兮崖谷暗烽火震兮山岳紅掣電
礮其迅人造雲梯而仰攻天吳觸鋸而捩首海若春波而
盪胸時則一夫挺嘯四野竿揭急貿首之讐樹同舟之敵
出主人奴弱肉強食爰使市井煙空衣冠獸匿排難絕聊
城之書請援虛秦庭之泣嗟此孤城草木爲兵赤符誰授
白馬誰盟惟是探丸擊制之流屠狗賣漿之丁裂棟柱以
結柵扣釜鐵以鳴鉦亦復勢雄負嶠險恃憑城五夜守陴

十旬抗衡坐愁月而弦歌不輟對慘燄而燈火逾明但知
一髮千鈞之重誰識泰山鴻毛之輕乃若閻尉和民突圍
冒刃戚史狗忠闔門赴燼亦有夫未亡兮婦懼辱而從井
父被執兮子抱頭而延頸兄弟爭死而褫衣朋友誓江而
痛飲徭胥曳妻子而魂塞江潮俠妓擲琵琶而血濺紅粉
其名不傳其事難泯豈雉介之硜硜覺虹光之頽頽其諸
士民玉石誰分望門無止繫組有羣百工隨器械俱盡諸
儒與典籍同焚野燐雜大陵之臭國殤陪冥漠之君任剖
肝而斲脛猶戟手而露齧殷孽周頑任人所云雖然田橫
之客皆稱義士眾庶憑生匹夫有志嗟此孤城本延陵禮
讓之遺得淮楚激揚之氣趁江濤而千里不迴倚天塹而
一絲若繫縱結纓之傷勇勝趨局之誇智以萬死之幽魂
博千秋之隻字庶徵往而俟來願移利以爲義

御試落葉賦

季芝昌

爾其涼蛩報秋棲鶴警露楓霞伫丹葭霜積素羌一葉兮
先零漸滿階兮無數歐陽聽秋夜之聲少陵憶春天之樹
想幽林以停車指夕陽而問渡何颼颼兮曉風遽蕭蕭兮
徧路此朱鄴所以傳唐代之篇夢陽因之有禁中之賦也
當夫春光旖旎春意句留碧葉紛其鬱鬱綠雲湛其油油
迄九夏兮木楸更千章兮蔭稠冪一天之晦靄倚三徑以

夷猶莫不望濃陰而思憩欣芳序之未秋秋風庭院秋雨
階除涼聲颯爾野色斑如草衰而蟀催唱柳老而蟲肄書
十里亭皋之路半牀開府之居夏清響於瓊砌拓明光於
綺疏竹隴之斜陽欲漏梧堂之夜月應虛則有敞雲寮拂
塵几楸局閒評瑤琴徐理客來而蠟屐聲乾人靜而茗鑪
煙起正冷序兮驚心訝清商兮彈指徑未荒松籬仍圍枳
看吹攆之辭條類枯萍之颭水雖年華之未衰已荏苒其
若此又有攜榼山北扶筇水濱苔磴露滑蘆塘雪新埽記
校書之候拈思題句之人見飄颺之不定疑宛轉兮相親
撲蕉衫而黏袖襯莎岸以鋪茵亦復低徊墜影振觸前塵

江陰縣志

卷二十七

藝文賦

五

書柿問慈恩之寺尋桃迷漁父之津時則涼生池館韻寫
巖阿星漢如洗洞庭始波村依烏柏屋補青蘿利松子之
黃落雜蓼花之紅沓鷗音隔兮安在蟬翼翳兮幾何添薪
而槐龍自古卷箔而柘蠶已過固延秋之興逸孰與夫嬉
春而樂多也是惟

上林景霽

禁禦煙含收良材於竹箭儲偉幹於榱枌計百年則棟梁
足用貫四時則柯葉能堪所由驗棗通而

德沛頌桐豫而

恩覃

伊志士之修尚鬱儒林之根柢躬被飾於典文心耕耨於
義禮羌建安之選時樹鄴下之旌檠橫馬槊以雄宙構爵
臺而飛陞才槃槃於龍樓華韡韡其朱邱矧俊髦之英英
彙簪裾之濟濟非孟晉而迨羣胡悻發而憤啟求素業之
自殫殆浮華之可洗惟斯道之醴粹引吾黨以酌斟鑒寡
和於郢曲晒輟彈於牙琴彼吳蜀之異域難瑜亮之同岑
感南皮之游躅追北場之聯吟公幹振其茂彩仲宣鏘其
雅音被偉長之奇服抗孔璋之高襟翩元瑜之書記亦藝
府之璆琳懿應氏之競爽實汝南之雙琛故連輿而接席

敢同術而殊心緬先哲之矩型垂前代之藻績崔慰志以
抒情馮顯志而呈態班幽通以縣邈張思元而慷慨允予
懷之機杼援柔翰爲鋤末文徽徽以蜚英思翬翬以惇誨
雖鰕生之匪才慕鴻筆而思配譬璠璣之在攻冀干莫之
就淬循遺策之鋪聞豈未知夫進退紛四序其代謝勤綴
學而靡荒屏棊博之嬉戲卻絲竹之清狂窮六經之奧窔
披百氏之縹緗歎季緒之薄譎猶倚摭乎文章羨德祖之
明悟又闇解之必彰儻遽享乎敝帚懼相承以虛筐亮厥
志之不篤繡槃悅其曷臧何時俗之玩愒曾莫慎於中藏
釋簡編以眇慮偉功名之可居有童牙而作相或華顛而

舉漁果銘勳於景鐘奚敞精於詩書弭節元武之苑濯纓
清漳之渠陋幼安之穿榻卑子魚之荷鋤孰一龍而能共
疇百鳥而不如奮執策以前路往託乘於後車將觀光而
利用得雅抱之所於綜惕厲於寸心乃寓言於不律羞采
采之春華望離離之秋實願蘭佩而蕙纒戒虎文而羊質
地三分以畫疆才一石而同室入敦歡於壘簾出覽輝於
紳鞞幸獲廁於羣彥詎甘蹈於暇逸景遽子之知非規宣
聖之恐失勉弗怠於修能庶自底於邃密

詩

行經季子祠

陳張正見

延陵高讓遠傳芳世祀移地絕遺金路松悲掛劒枝野藤
侵沸井山雨濕苔碑別有觀風處樂奏無人知

九日宴江陰

唐杜審言

蟋蟀歸期晚茱萸節候新降霜青女月送酒白衣人高興
要長壽卑栖隔近臣新沙卽此地舊俗坐爲鄰

哀節婦薄氏詞

并序

李華

武康尉薄自牧嘗謂余曰僕有賢女適江陰尉鄒待徵
亦良士僕先老矣鄒氏孤立時無古人誰復知之余常

江陰縣志

卷二十七

藝文詩

八

記其言及江左之亂待徵解印竄匿其妻爲盜所驅將
辱之妻密以待徵官告託村媪尋待徵付焉而後就死
嗚呼自喪亂以來士女以貞烈斃踏者眾矣余不盡知
薄氏者與其父遊聞其聲義動江南又焉得不賦爲作
哀節婦詞

昔歲隋盜並起橫行海浙江陰萬戶化爲凝血無石不焚
無玉不折峩峩薄媛炯然名節自牧之子鄒徵之妻玉德
蘭姿女之英兮鄒也避禍伏於榛莽婉如之賓執爲囚虜
匍匐泥沙極望無覩出授官之告託垂白之姥姥感夫人
爰達鄒君兵解求尸在於江濱哀風起爲連波痛氣結爲

孤雲鳧雁爲之哀鳴日月爲之蒙昏端標移景而恆直勁
芳貫霜而猶存知子莫若父誠哉長者之言

自牧謂予曰
僕有賢女

送王汶宰江陰

包何

郡北乘流去花閒竟日行海魚朝滿市江鳥夜喧城止酒
非關病援琴不在聲應緣五斗米數日滯淵明

新安送陸澧歸江陰

劉長卿

新安路人來去早潮復晚潮明月知何處潮水無情亦解
歸自憐長在新安住

送陸澧倉曹西上

長安此去欲何依先達誰當薦陸機日下鳳翔雙闕迴雪

江陰縣志

卷二十七

藝文詩

九

中人去二陵稀舟從故里難移棹家在寒塘獨掩扉臨水
自傷淪落久贈君空有淚沾衣

送韓司直路出延陵

郎士元

遊吳還適越來往任風波復送王孫去其如春草何岸明
殘雪在潮滿夕陽多季子畱遺廟停舟試一過

定山寺

薛逢

十里松蘿映碧苔一川晴色鏡中開遙聞上界翻經處片
片香雲出院來

仲夏江陰官舍寄裴明府

李嘉祐

萬室邊江次孤城對海安朝霞晴作雨濕氣晚生寒苔色

侵衣桁潮痕上井欄題詩招茂宰思爾欲辭官

自常州還江陰道中作

處處空籬落江村不忍看無人花色慘多雨鳥聲寒黃霸
初臨郡陶潛未罷官乘春務征伐誰肯問凋殘

送張惟真少府之江陰

李中

相送煙河畔酒闌登小舟離京梅雨歇到邑早蟬秋俗必
期匡濟詩誰互唱酬晚涼諸吏散海月入虛樓

送江陰霍明府之任

方干

遙遙去舸新侵郭葦兼蘋樹列巢灘鶴鄉多釣浦人虹分
陽羨雨浪隔廣陵春知竟三年袂琴書外是貧

江陰縣志

卷二十七

藝文詩

十

寄魏璞

皮日休

文籍先生不肯官絮巾沖雪把漁竿一堆方冊爲侯印三
級幽巖是將壇醉少最因吟月冷瘦多偏爲臥雲寒兔皮
衾煖篷舟穩欲共誰遊七里灘

前題

陸龜蒙

經苑方成墨沼開何人林下肯尋來若非宗測圖山后卽
是韓康賣藥迴溪籟自吟朱鷺曲沙雲還作白鷗媒惟應
地主公田熟時送君家麩蘖材

送王判官之江陰軍幕

宋梅堯臣

往時初渡江頗愛江南美誰知坐臥間思及煙波裏絮逐

魴魚繁鼓添莼線紫君行語風物到日應相似

送江陰簽判晁太祝

去無珠履爲上賓進船申浦憶春申江田插秧鶉鴣雨絲
網得魚雲母鱗青天折桂香未減紫鼓煮莼甘更新平時
況可樂風月吳風信美聊前陳

送王郎中知江陰

持歸霄漢青綾被去看吳都白馬潮疊鼓渡江寒浪伏鳴
鑊入境野雲飄魚穿楊柳誇鮮膾人采芙蓉學細腰家有
三槐爲太守弟兄誰似李文饒

求守江陰未得酬朱昌叔憶江陰見及之作

江陰縣志

卷二十七

藝文詩

十一

王安石

黃田港北水如天萬里風檣看賈船海外珠犀長入市人
間魚蟹不論錢高亭笑語如昨日末路塵沙非少年強乞
一官終未得祇君同病肯相憐

寄朱昌叔

清江浸浸繞城流尙憶城邊繫小舟射虎未能隨李廣割
雞空欲戲言游雲埋塞路驚塵合霜入春風滿鬢愁此日
君書苦難得漫多鴻雁起南洲

思王逢原

百年相望濟時功歲路何知向此窮鷹隼奮飛皇羽短麒

麟埋沒馬羣空中郎舊業無兒付康子高才有婦同想見
江南原上墓樹枝零落紙錢風

遊壽凝寺

王令

寥蕭枝上風蝸蛸以秋告黯鬢道旁樹綠蔭涼可冒况承
積陰餘急雨蕩晴昊初涼逞新威宿暑懲舊躁漫漫出門
路踽踽可誰造江聲洶西奔海遠劇東到中門可行望洗
滌去塵抱况於林阜間古屋架晴燥蝨蟲稍斂收軒戶可
淹傲惜乎予得遊不可攜所好踟躕伫歸步風竹冷相勞
久寓悟空刹臨行書此

蔡襄

岑寂精廬切半空古原高下稻花中蓮趺披素新秋社花

江陰縣志

卷二十七

藝文詩

十二

萼雕紅細雨宮孤鶴睡迷千樹月斷蟬吟繞一樓風心縻
尺組遙相謝歸馬南蹄疾似蓬

冬夕宿演教院

葛密

槭槭嚴風夕煙寒蕙炷清燈生花裏豔雨作雪時聲旅夢
回殘角吟懷繞廢城寂然羣動息吾亦世紛平

芙蓉湖

胡宿

小湖香豔戰芙蓉碧葉田田擁釣篷嵐氣欲飛山隔岸秋
光不定水搖空翩翻雪鳥爭投浦潑刺霜鱗對擲風正是
滄浪濯纓日一竿多謝紫溪翁

宿江陰廣福寺

陳鈞

我非山中人暫借山中宿靈風散微陰片月出喬木蕙帳
棲夕香古井汲寒淥名緇多夙契延坐同茗粥况與靜者
俱善信久已熟清辭儷陶謝元談幹身毒所愧形跡拘無
由繼高躅鐘聲殷江島露氣藹林麓良遇愜素懷徘徊至
天旭

題定山梵放軒

胡瑄

道人避世氛山腰著祇園千夫斲青冥豁達窗戶褰鬼神
閒施設儼護龍象筵法鼓空中鳴龍臥層崖巔幽靈駭今
昔異事樵夫傳眷茲水雲侶精賞託妙緣努力辦已事追
駕佛祖肩憑高發鐘磬梵音落諸天况時解禪縛迢遙倚

江陰縣志

卷二十七

藝文詩

十三

層軒放意萬物外目送孤鴻翩

熙春園

楊蟠

桃源未識恐微茫每坐青林慣日長魚鳥自同千里樂風
煙漫逐一城香竹圍月色來深院花引春情過短牆人世
定知何處好且勤詩酒惜年光

澄江亭

萬里松州對海門蒼亭縹渺出飛塵東浮不礙三江下西
轉無聲百谷賓月靜秋紋收白縠天橫暮色變黃銀風流
小謝千年外解詠消愁更有人

朝宗門

百尺樓高四望中雲深一雁度長空人間砧杵催寒事郊
外笙簫逐土風天帶江山元自好地流河漢忽相通丹心
直北看飛雪往往隨花入帝宮

題定山寺法遠上人壁

賀鑄

支郎風味喜相親乘興來尋雪後春夾徑竹陰疑礙馬隔
江山色似招人豈無暇日容高臥如有閒田願卜鄰預約
東城二三子歲時相過莫辭頻

書懷呈江陰軍

裴若訥

男兒憂道不憂貧匣有焦桐篋有文卻訪姑蘇臺下隱滿
船明月一溪雲

江陰縣志

卷二十七

藝文詩

十四

紫葺江上是吾家一葉扁舟一釣車何必陶公種魚法雨
汀煙渚盡生涯

浮遠堂

楊端叔

萬松相摩天籟作一塵不留心鏡空毋庸寶焰照牛渚已
見浮涎吹龍宮零丁沙洲抗水勢替戾塔鈴語天風賈胡
惜錢不自惜晝夜牙籌澎湃中

虎跑泉

張彥卿

乳泉發穴漏巖根亂石成池溜始分鴻漸當時高品第虎
跑今日信傳聞山僧勺供疑甘露野史烹茶勝白雲應是
靈源遲出地不然須冠季卿文

白龍洞

袁默

開元年中關輔旱靈岳神祠禱幾徧少監馮生能畫龍明
皇命試新池殿落筆蜿蜒勢未已素鬣冰鱗濕如洗池波
洶湧雷電驚雲氣之門白龍起吾觀馮豈作霖人畫龍能
雨疑有神深山大澤多窟穴不應杳眇不似真澄江接海
連空白泓深當是神龍宅螭虬狡獪非其倫河伯江妃敢
驅役霜鎖煙關晝不開時傾膏雨蘇民災一鑪香火動誠
意風馬雲車天際來吾聞澤國多水患淮甸地乾多苦旱
願均神力遍四方無令水旱常相半

石女冢

江陰縣志

卷二十七

藝文詩

十五

君不見湘江不流湘水清悲風愁雨能無情靈妃寶瑟聲
未絕九疑雲鎖蒼梧深又不見霸陵路入新豐道顧念邯
鄲意悽惱夫人鼓瑟君爲歌北山爲椁吾將老去來死者
不勝計歷歷道旁猶可記人言梁女好鼓琴琴心未許人
知音高山流水聲已虛想像當時足幽思九原可作誰與
歸秋風蕭蕭草淒淒邱墟之下多狐狸

秦望山

海上仙山與凡絕迢迢弱水不可涉鷺膺蜂準豈不知長
生不死心未滅雄伯關中亦一時并吞六國猶指揮自矜
功德愚黔黎驅山塞海疑有之吾聞盧生言辟惡真人至

又聞徐市言蓬萊藥可致願捕巨魚連弩射史遷記此不
及彼古老相傳恐真是岷峨一夜失崔嵬峩耳山從蜀道
來嗟乎六丁汝狂斐區區爲役長城鬼

浮遠堂

孫觀

月墮山城曉沙寒水國秋雲根拔地起冰柱蹴天浮紫翠
分鼇嶺青紅雜蜃樓舟船通萬里城郭數三州刺史馮熊
貴仙翁控鯉遊八龍追後騎五馬駐前驕露舄迎門鵲風
簾壓海牛地偏餘勝踐山好對冥搜雨爲催詩至雲因度
曲畱歡呼領百罰跌宕散千憂顛倒青霞帔淋漓紫綺裘
誰鑿峴山石千載記風流

江陰縣志

卷二十七

藝文詩

十六

夏港僧舍

魏了翁

迅商呼不來午汗如翻漿道人空萬緣邂逅贊公房虛室
千世界圓滿一鉢囊碧雲護兜率白日耀普光蕭蕭蘆葦
中著此清淨坊鑑師從西來一喝登慈航唾手舉慧刃斫
斷煩惱韁邀我供煮餅心地陡清涼官焙破蒼壁桃笙漲
寒江從師問究竟室西照殘陽

君山

石祖文

遠邇朝宗勢拱辰名高豈特爲春申孤峯堆阜無多地一
水僊凡隔幾塵簪履三千誰念楚山河百二漫誇秦雲煙
勝槩無今古俯仰休悲迹已陳

君山浮遠堂

王呈瑞

萬室東南裏炊煙落照黃山腰圍埜濶沙尾刺江長好景
終然遠浮雲轉已亡幾多如湛輩今古一淒涼

浮遠堂

方萬里

淮淞平分一水間開林陡見八溟寬江山曾識三千客風
月重歸十二欄天迴不知身世窄境清翻覺骨毛寒楚帆
切莫貪程急潮水未平行路難

遊白龍山

蔣靜

駐馬白龍潭拂石青松下雲從潭底生風向松枝灑風雲
了無心聊隨白龍化勿謂雲風擾中含閒暇者

江陰縣志

卷二十七

藝文詩

十七

假寓翠光亭

君山堆翠出危尖練水浮光照短簷夜鶴曉猿同冷淡胡
牀塵尾獨安恬雲來畫棟休遮眼月到澄潭任透簾還似
棄官陶靖節北窗高臥怕誰嫌

題昆山

四十年前掉臂游寺庭荒落易悲秋重來氣象渾非昔滿
院松杉翠欲流方外故人惟白骨壁閒陳跡獨銀鈎青春
祇道堪行樂獨倚僧窗萬斛愁

洗心亭睡起偶題

黃梁未熟酒猶醲一夢南柯事已空水綠山青無限好今

來古往不知窮龍吟竹笛秋江面雪糝蘆花夜月中清景
阿誰偏占得白頭波上釣魚翁

舟行江陰道中

張彥實

雨後侵篙一尺渾敗蒲衰柳亂填門夢聞斷角送餘響起
看新潮到舊痕處處魚鹽成市井家家罾筍長兒孫更傳
下詔寬民力斗米三錢何足論

題耿氏溫清堂

上官均

遠山終日自清輝縹渺喬林野氣微秋菊已開陶令徑春
風好舞老萊衣溪頭釣艇資閒興松下歸禽伴息機吟倚
醉登堪自慰不須悵望白雲飛

江陰縣志

卷二十七

藝文詩

十八

前題

滿中行

密牖疎櫺次第施卻寒清暑兩相宜惟知堂上雙親樂不
覺人間四序移美酒先春和氣滿茂林亭午綠陰垂閒居
就養如君少無負南陔孝子詩

道成墩

葛勝仲

翛翛一羽翁奇骨兩目方乃以貧自樂餐霞辟穀腸混世
人莫識結茅居僻荒一墩僅十畝培塿萃彼疆惠峯作南
屏秦望橫北牆隱此不記年悟仙號青暘翩然仙道成陟
墩神遠翔指墩名道成人以許仙揚豈無緱山人吹笙雲
錦裳令威去千年歸來賦歌章青暘得仙去千古傳此鄉

訛而爲柳跖吳魯路渺茫柳爲橫行盜安肯城此旁吾爲
正斯繆百世流餘芳

九日游君山

呂天策

路分支徑入蘆花繚繞江身覓酒家晚日樓臺金突兀映
山鷗鷺玉橫斜解衣狗竇呼光逸落帽龍山想孟嘉欲趁
老漁風一葉直窮天漢問乘槎

洗心堂

曹 詡

清光秀發水雲鄉不見騷人意未降風壓柳梢低酒舍月
移松影上僧窗山泉漲起潮三尺野老釣歸魚一雙更待
練光斜襯日坐看金斗熨秋江

江陰縣志

卷二十七

藝文詩

十九

松風亭

亭前山影漾江流亭外雲霞礙舉頭俯石下聽松上籟隔
鄉遙認水邊舟四簷寒送沙汀雨一徑煙籠寺竹秋此曲
此聲應未變抱琴期與故人游

白龍寺祈雨

徐 綱

萬木梢頭見塔尖道人於此卜幽潛深林六月風敲竹古
寺三更月入龕天旱蛟龍藏窟宅水枯魚鼈露鬚鬣我來
赤日祈甘雨臥聽蕭蕭瀉屋簷

山亭

錢 厚

又踏君山路來驅陌上塵江仍舊時面我是去年人愛聽

松聲古休催柳色新片雲銜落日梅與月爭春

別葛德裕主簿

王庭珪

官冷身閒簿領稀時從物外赴襟期憑君少緩青絲鞵爲
我聊傾碧玉卮野寺石泉秋煮茗松窗雪屋夜論詩懸知
別後東風近先寄寒梅第一枝

送邱宗鄉帥蜀

楊廷秀

人似隆中漢臥龍韻如江左晉諸公四川全國牙旗底萬
里長江羽扇中玉壘頓清開宿霧雪山增重起秋風近來
廊廟多西帥出相誰言只在東

從板橋買舟上青暘

戴昺

江陰縣志

卷二十七

藝文詩

二十

卸馬板橋西扁舟逆上溪水鏤巖骨斷煙截樹頭齊野鴨
驚人起村雞上樹啼老農頭雪白猶自把鋤犁

江濱曉步

戴復古

津頭曉步落潮痕行盡蒲根到柳根雁影參差半江月雞
聲唧唧數家村求魚看下連筒釣乞火聽敲隔舍門料得
錦城無此景欲將圖畫寄王孫

江村晚眺

江頭落日照平沙潮退漁舸閣岸斜白鳥一雙臨水立見
人驚起入蘆花

憂澇

陳剛中

暨陽古澤中今歲仍大水舟行民田中一浪四十里農夫
相對泣父子飢欲死酷吏亦何心誅求殊未已豈繫竭膏
血直欲剝膚髓哀此無告民有生皆赤子天災自流行助
虐亦何理我愧才術疎陸陸佐小壘熟視不能救有淚空
自灑皇心念下民惻怛形詔旨王言旣諄復象魏幾黃紙
要須盡蠲除仰稱德意美人微言或棄歸休從此始

遊君山

魏寶先

海角天高月滿山新亭清淚灑爛斑春風吹斷興亡夢潮
落潮生小石灣

送邱宗卿博士出守嘉禾

呂祖謙

江陰縣志

卷二十七

藝文詩

二十一

樵李國西門道里去天咫訟庭人摩肩客館舟銜尾涼燠
變須與風俗殊駭視心平理自見周道本如砥堂下萬休
戚堂上一笑嘖是心苟不存對面越與秦豚魚尚可孚况
此能言民君看津頭柳葉葉皆相親奮髯疾抵几解衣徐
探雛古來多快士氣吞兩輪朱簿書高沒人迎筆風摧枯
自許豈不豪歲晏終何如

季子廟

曹確

人間不記吳王事江上今存季子宮壞壁亂飄青蘚雨破
簷時蕩白榆風衣冠何處理春草雞酒長年任野翁下馬
一看思舊德浮名應與暮雲空

集君山

吳 竽

生平豪氣老難降
南北中分歎此江
多病能消山屐幾
清游幸尾使旌雙
天連遠水碧千里
雲護夕陽紅半窗
繾綣主人畱客意
船頭昏鼓又逢逢

浮遠堂

吳漢英

天險東南限此江
支分暨水北爲陽
孤山不動嬰潮怒
客艇飛來說路長
檻外煙雲如出沒
坐中頃刻變炎涼
裴回頓覺塵纓絆
一曲滄浪誚月光

雜詩五首

元 陸文奎

貞女不自媒
蛾眉爲誰掃
春風吹年華
閉戶綠芳草
靈修

江陰縣志

卷二十七

藝文詩

二十二

不我顧攬鏡紅顏
槁焉得北堂萱
聊用寬憂抱
又懼青蠅讒
善使黑白倒
遂令親者疎
我欲畀有昊

東坡譏舉子有類
候蟲鳴退之譏
詩人謂作蒼蠅
聲制策直而核
聯句新且清
自作復自譏
持論終未平
無人解此意
起我懷古情

蛙從井底語
豹在管中見
若遇大方家
一笑直自獻
饋漿意已驚
抱甕力殊倦
因知巧若拙
頗覺狂次狷
玉以德保瑕
珉以多故賤

火雲吐赤日
旱勢千里濶
古人救荒術
食貨知本末
家家算口賦
殆類僧持鉢
激水活肆枯
植木蔭道暍
諸公善努

力赤子正饑渴

棄兒啼莫問瘦妻臥路旁公廩已告匱私戶猶多藏嗟哉
守錢奴竊盜勢且猖莫保千金軀汝富安得長鍊炭不及
炊寶玦空自將獨有黃巾寇不入鄭公鄉高賢古所貴薄
俗今可傷

題萬戶府瑞麥圖

河中之野木連理文人作頌何所美鯉湖之水蓮雙葩史
臣記異不足誇木葉飢來豈堪食蓮花遠觀空有色由來
上瑞是豐年芙蓉池外麥連天一莖三穗攢秀穎好事軍
中萬口傳閱武堂成政多暇刀劔不如牛犢價老農噉飯
江陰縣志

卷二十七

藝文詩

二十三

樂昇平奇祥異產從天下香餌先收夏隴雲雪匙可卜秋
田稼絕憐西蜀杜參謀因饑空懷當世憂崆峒麥熟無人
穫且問王師休未休

栽桑

細聽鄰婦低眉說年年育蠶苦無葉山童執筐入市賣一
稱百錢猶未愜更兼春風上窗寒忍見蠶饑頭戢戢買絲
織絹輸官外空借鄰機閒一月阿姑卒歲無襦袴小兒露
骭風吹裂今時縣官清且明課民務本令必行擔桑赧肩
荷鋤去青青布種環郊城明年家養一百箔巷響縑車棟
花落滿籠新絲白雪香聽賽蠶官鼓聲樂

庚子七月書事

今年低窪水生魚去年高亢旱坼龜陰陽似屬天公事廟
堂可是無皋夔勸分納粟令如火老稚依然鵠形餓嗟汝
命薄獨可憐穹宮臣室無凶年

立冬

早久何當雨秋深漸入冬黃花猶帶露紅葉已隨風邊思
吹寒角村歌相晚春籬門日高臥衰懶愧無功

夏港道中

微煖背曝日輕寒而受風人行官路側鵲起野田中細草
陳根綠疎林病葉紅故人雲水隔來往愧衰翁

江陰縣志

卷二十七

藝文詩

二十四

浮遠堂陸誼齋按察同賦

曉渚風移畫舫輕秋原日射繡衣明自攜玉麈看山色盡
屏繁弦聽水聲季子高風喬木古春申往事暮潮平塔鈴
自語無人會飲散江雲霽月生

雪江獨釣

極浦寒雲壓雁低石磯老叟手如龜茫茫沙上銀千頃裊
裊風前玉一絲鷺失蘆花驚月早魚吹柳絮上冰遲故人
物色嫌相認縱有羊裘不敢披

天慶觀丹樓

丹樓獨倚對青山山色依稀十二鬢曉氣淨連江樹碧秋

雲低護石苔斑仙人長嘯凌風遠羽士吹笙帶雨閒安得
置身蕭爽地捲簾時待鶴飛還

天壽觀載夢舟

中流一葉下寰瀛偃息猶便鶴夢清渾沌未分龍伯國江
山長繞化人城帆開細雨迷春蝶棹拂涼波動石鯨回首
天池三萬里臥遊何惜片時程

梅花

繆鑑

鐵石槎枒玉粒姿詩中圖畫畫中詩半稜山色初晴後一
截溪煙欲暝時流水帶雲棲瘦影小窗和月上橫枝老來
自覺吟情拙莫遣孤山處士知

江陰縣志

卷二十七

藝文詩

二十五

題悟空寺

不到招提二十霜眼明還識魯靈光雲餐已供伊蒲塞風
鐸猶傳替戾岡新寺金湯龍化遠舊家王謝燕飛忙行人
指點簪犀地十里春風土尚香

遊小石灣

俞遠

前年遊小石小石之下江悠悠今年遊小石江水只似前
年流江流日夜流不息石根水齧成沙礫主家銀瓶三尺
高長向江邊宴賓客江邊雲木藏華構主人不歸春鎖畫
開門掃地借鋪筵舞影出闌驚雉雉一春天氣今日佳城
中千人萬人來步障飄紅香散霧撲面不去飛塵埃移樽

更就江流飲酒光五色沙如錦懸 欲落未落處挽客更
坐毛髮凜青天龍掛東海門颯風 來天晝昏白波如山
潑山鼻坐恐此地爲江吞金支翠旗光閃灑冉冉靈胥騎
白馬我欲招之招不來大鯨噓虹射盞罌此景向來良不
侔丈夫跌絕婦女愁手中橫竹孤鳳叫日脚迸落蘼蕪洲
眼空高興不可遏割肉大啖湯沃雪風休月出浪復止小
娃強歌聲不悅我言小石天下無眾客相顧皆胡盧說東
洛談西湖我請謝客客莫誣西湖白鶴去不返東洛看花
生已晚

天壽觀清隱軒

江陰縣志

卷二十七

藝文詩

二十六

讀罷黃庭內景篇道人風度亦翩翩山中呼酒喚明月天
上賜衣生紫煙啼過宮鶯春幾度飛歸遼鶴世千年向求
書榜詞林客可怪逢仙不學仙

澄江八景詩

蓉城曉烟

落月昏昏城樹白山煙一帶接閭居天高樓鼓晴先覺江
近篝香潤不除刁斗營前看洗馬轆轤井上聚穿魚蓬萊
有約蒲帆重欲問麻姑借羽車

巫門夜雨

巫子門前沙擁波泊舟黑夜雨滂沱龍呼匣劍辭人去鳥

作飛車送鬼過翦燭頻昏鈔細字看天未旦起狂歌玉關
何處頭如雪明月長竿還挂蓑

海門賓日

天在海門東復東星移河落日曛曛三聲雞唱齊州白五
色鸞翔弱水紅舟楫盡揚子岸衣冠應滿大空宮寸心
老我傾葵藿扣缶狂歌兩鬢蓬

孤山釣月

大江卷石是孤山山下漁人戴鶡冠花發廣陵忘捩柁水
吞雲夢好持竿珠光電轉龍堂晝玉雪空飛兔白寒一曲
菱歌歌遽止馮夷按節鼓狂瀾

江陰縣志

卷二十七

藝文詩

二十七

石灣春霽

春日少晴晴卽風石灣今日好春融已憐野水添杯綠更
有雜花開樹紅錦帳移厨人簇簇銀鞍並妓馬瓏瓏擊壺
錯按伊州弄句落鷗波浩蕩中

揚子秋濤

大江日日潮流地八月飛濤天半來高蹴一門危立海散
馳千道殷奔雷鳥驚斷磧都相失鯨挂橫山不及回寄語
北來能賦客江南奇觀遲登臺

沙嶼晚渡

吳山望斷楚山蒼江北江南一葦杭野屋半開人慘澹征

車相次馬元黃羽竿風急回鳴鴝魚笱燈微隔樹桑指顧
揚州莫惆悵燕姬樓上勸飛觴

淮甸晴眺

廣陵南盡是長川山隔川流不隔煙一騎看花來闕下千
帆轉粟上天邊鷗波雁磧芻蕘合豚穿雞埒井絡懸我住
孤城愁偃仄定來釣弋過殘年

過蔡涇閘

邱元鎮

客行涇口上危橋北望城闈十里遙港汊不容三尺水舟
航全藉兩番潮蠶苗半起桑迷眼雉穀深藏麥到腰暮宿
前村楊柳渡買魚沽酒慰蕭條

江陰縣志

卷二十七

藝文詩

二十八

我生吟

許恕

我生本不羈只合栖巖幽不與木石俱還同鹿豕遊失身
落塵網羲娥逝不畱飛鳥忽入籠縱鱗初中鈎願借東南
風決絕西江流倒解蒼生懸一洗諸公羞生能耕吾土死
能歸舊邱遂令漂泊踪慰此遲暮秋

小石灣

晴沙展芳席春山駐遊騎飛雲度鳥背驚濤觸鵝鼻遠觀
山水佳近愛花木麗風塵一失所行樂猶夢寐

禮敬寺

攀崖度峭壁緣澗入幽徑山堂絕宏敞金碧相輝映石泉

釀香雪松風翳清磬煩慮庶可祛聊復此游泳

長亭柳

長亭柳長亭春色濃如酒柔條細葉亂風煙年年盡屬離
人手汴水河隄空復春朝元宮闕已成塵何似長亭縮離
別嘗送東西南北人我家揚子江頭住憶捲疎簾看飛絮
幾時折贈北郭生歸臥君山最佳處

邊塘樹

邊塘樹從來生在邊塘路千船萬船百尺牽潮去潮來幾
朝暮樹身截如刀鋸痕半身刻鏤半身存生成亦蒙雨露
澤枝葉叢茂煩深根可憐托身不得地銷盡凌雲浩然氣

江陰縣志

卷二十七

藝文詩

二十九

深林自有棟梁材廢質宜爲人所棄

告天子

告天子爾何微麥秀風暄高下飛餘音嫋嫋入雲去飛向
天閻如有訢天閻蕩蕩虛且高言之諄諄徒爾勞多少臺
臣如柱石緘口全身保衣食

蕭寺早行

張家宅前蕭寺橋侵晨發船江霧消村雞三唱屋角樹柔
櫓數聲沙際潮此時飛上海底日錦雲滿江光蕩搖水聲
漣漣繞灘轉霜氣烈烈隨風飄人生各各有所役豈水有
漁山有樵干戈正集沙塞戰環佩已退天門朝嗟子久作

江海客往來自歎鄉關遙石田茅屋倘可遂白日醉眠吹
短簫

故國吟

水郭春雷後能無故國思河豚羹玉乳江鱈膾銀絲鬧市
燒燈夜晴灣立馬時歸心驚半百已辦草堂資

求稻種

百年多難寄殊方江草江花滿意芳避地不知茅屋小到
家應念石田荒東吳秋後思萑切南國春來浸種忙野老
倘分紅稻粒黃雲應繞杜陵莊

木棉歌

熊礪谷

江陰縣志

卷二十七

藝文詩

三十

秋陽收盡枝頭露烘綻青囊翻白絮田婦攜筐採得歸渾
家指作機中布大兒來覓襦小兒來覓袴半擬償私債半
擬輸官府竹籠旋著活火熏蠹蟲母子走紛紛尺鐵碾出
瑤空雪一弓彈破秋江雲中虛外泛搓成索晝夜踏車聲
落落車聲才冷催上機知作誰人身上衣小女背面臨風
泣憶曾隨母園中拾

分題送李仲常江陰知事三首

陳樵

暨陽湖

白浪浮天雪作堆羞將俗客洗塵埃月從水底沈鈎去船
似鷗邊泛葉來野屋有籬編白荻漁磯無席藉蒼苔功曹

吟苦多詩渴擬借平湖作酒杯

釣臺

憶昔元璜上釣鉤
鷹揚曾起佐姬周
臺高人在空中立
雲靜天從水面浮
石裂猶疑千古雪
風吹不斷一絲秋
政成蓮幕多清暇
他日停驂此地遊

翠光亭

亭前練水細如縈
亭上君山玉作屏
林斷才通吳月白
雁飛不盡楚天青
莓苔著雨長黏石
翡翠迎風欲墮翎
怪得步兵迷望眼
詩成正值酒初醒

揚子舟中望鷺鼻山時聞黔南消息 王 逢

江陰縣志

卷二十七

藝文 詩

三十一

山環芙蓉城私怪鷺鼻狀奔濤
鎮長薄大石凜相抗勢雄
千軍壘氣奪萬鍾藏草樹春不蕃
莓苔滑難傍剛風過靈
雨復值桃花漲破暝鷗鷺盤乘陰
龍魚王飄鼓一葦閒攬
之膽增壯謝安晉元臣豈跼江海
量蒼生方顛連其敢遂
疎放黔陽百粵地黃霧吹虎嘖再
觀神秀姿不止西北向
焯焯蒼精出閃閃白月漾三叫馮
夷宮吾奚獨惆悵

三貞篇寄納麟哈刺參政幕下僚友

梧西女陳氏顏色絕勝玉阿耶
燈窗下古傳常暗讀義須
嫁官人麻臬心所足兵麾忽東
指烽火蔓平陸魚鼈遭顛
連雞狗同迫逐猥猥哆其口反
噬几上肉母子泣相誓甘

死不汝辱春輝黯門楣寒日照鬼錄皇天實鑒臨家廟爲

慘肅

陳氏母曹宋直講
確之七世孫女

髻婦

惠婦吳
俱里人

亦在難自判受命獨

臂血濺賊衽賊歎爲斂縮差差白刃閒偉節驚耳目荒野

雲雪暮緬想會深竹水流風悲鳴星迸萬羽鏃回首陷沒

地何限委溝瀆大參行當來卹典具簡牘前湖百世祀

謂何

烈女明粧儼車服從以雙素鸞配享疇敢黷孤篷任漂轉餘

齒寄草木倡茲三貞篇庶用矯浮俗

義僧行

世降道淪喪盛事罕見之我歌義僧行斬取國土知僧臻
生夏浦俗號徐大師勇敢重意氣赤手可獵麋張忠郭解

江陰縣志

卷二十七

藝文詩

三十二

流任俠不計貲臻願出門下效死誓不移盜尋寇馬洲魚
肉乎蒸黎元戎堅營壁大姓深溝池壯哉張父子分率脫
項兒父擒子死難家不得斂屍臻聞切齒恨恨死不同時
夜卽操斧刀奮身斫藩籬徑入牛宮內斧斷張繫維手殺
盜六人力挽閒道歸妻孥拜堂下金幣謝所私上公賜巾
裳欲以好爵縻幡然掉臂辭還山弄摩尼方今國步艱中
外罹瘡痍銅虎盡懸綬鐵馬誰搴旗嗟爾匹夫臻足張三
軍威何不食君祿爲君靖淮夷收名魯仲連千載爲等期
天秋黃葉脫日暮元雲馳歌詩節鼓吹用壯吾熊羆

避亂綺山謁子方先生陸公墓

我經冷水灣缺月照微服景非度秦嶺事類避同谷松深
間無煙狐兔紛竄伏隆然四尺土卷卷在東麓問是先生
墳感慨逾慟哭洵書失歐陽蕢對多馮宿許韓兩耆舊許益
之韓明善時論推鼎足憶過先人廬白駒駐修竹周情與孔思
小子幸私淑天回晨星稀世亂烽火屬心焉采芳藻中宵
不盈掬太元屬桓譚九歌繼宋玉抱膝獨長眠披榛忍南
逐

遊鯉山

鄉山三十三遊鯉奠郊南巖然獨高大秀揜東諸嵐土剛
蓄炎精厓仄削劒鐔我嘗挹飛翠遠在滄江潭波濤與伏

江陰縣志

卷二十七

藝文詩

三十三

興雲霧相吐含恍然穆王駕八駿左右驂又如琴高仙脚
踏朝蔚藍久思更徽號新喜遂幽探太白賦九華後來成
美談狂歌繼其武林澗免愧慚春風綠瑤草秋霜紅石楠
行將修月斤爲鑿避世龕蛟龍正格鬪鯤化誰其堪

義鄧

吾鄉有鄧添千里負主骨晨夜竄草間宛轉皆虜窟胼胝
苦何辭性命閒一髮日車昏盪裊虹暈或抱月魂氣相衝
搪鳥獸亦獠狨經過百戰地青春暗消歇深幸主有靈全
生及城闕主母悲喜集流淚心激越主妾事他人空庭自
花發主昔爲龍蛇公論不可沒但感衣食恩疎戚均賞罰

在家爲義奴在軍爲義卒庶幾銜土烏尙愧擊蛇鶻淒淒
薦霜露哲哲上參伐不見秦舞陽悲風動天鉞

席帽山辭

席帽山兮岿亭山之人兮朝鉏暮經日月往來兮雲下上
俯萬物兮塵冥冥塵冥冥兮江介黑彼山人兮衣苧白帶
杜蘅兮咀松柏心周流兮影斯息出無節兮人無時猿鳥
胥樂兮樵牧我知學苟修兮行著稿死巖壑兮予焉悲

故將軍歌

并序

故將軍歌哀上萬戶蒙古氏丑廝侯也侯字靜如以世
勳佩三珠金虎符官昭勇大將軍鎮江陰謙恪尙義人

江陰縣志

卷二十七

藝文 詩

三十四

悅慕之至正十一年淮西亂督軍九江取道安慶時湖
廣威順王在道王聞侯頓兵卽帳下以退守地虛弱強
侯爲張飲之會宣讓王遣使諭旨曰安慶控淮江要衝
命侯就鎮前後出師凡二十九捷十二年冬十一月寇
悉眾水陸並進侯連破之翌日復大破輕舟追後中流
矢卒是月二十九日也二王哭之哀給白銀五十兩賻
其葬先是逢與宴侯第時海內無事嘗謂侯曰太歲在
辰侯當保障一方戰勝恐後不利盍慎諸侯荅曰大丈
夫戮力王室死無憾也侯事親孝征閩寇衛海漕咸有
功云

將軍舊乘青驪驪蒼龍金虎雙輝光揚旌伐鼓靖閩徼山
鬼迸落黃茅岡長鯨喊呀欲東噬以身扞海民樂康十年
楊柳蔭環堵一夜苜蓿空沙場淮江蕭條咽流水殺氣妖
氛亘彭蠡提兵假道古舒州親王遮畱勞玉趾王言三邊
賊緣蟻將軍不止我其死月氏髑髏酒數升諾重泰華輕
邱陵儲胥孤懸使雜守睥睨危急期先登萑蒲獵獵開金
翅篁竹深深攢鐵菱長驅大捷二十九生俘千人梟萬首
猙獰健兒駿奔走電掣雷訇若神授東南瘡痍合未蘇終
焉性命豺狼有仲冬炎風動地吹太陽血赤芒星垂將軍
百射百中之弓撥矢鉤天爾爲黃蕉丹荔芳菲菲保障千

江陰縣志

卷二十七

藝文詩

三十五

里今誰祠霜繁雪稠侯我思

連環歌

并序

連環歌爲杜先生夫婦而作也先生諱友開字陽父世
居江陰之君山教授數十年資束脩自奉妻吳辟纁以
助之天厯閒災荒學徒散去先生竟餓死初吳昆弟屢
勸斬邱木粥墓地可少延性命先生在羸億中堅持不
可繼欲挈吳歸吳曰夫旣盡孝妾獨不以義自處乎遂
相枕藉而卒逢懼歲遠而事泯也故序而歌之曰
白玉雙連環瘞在春申山山前夫婦義同死心與連環鎮
相似日月合照無欠虧天地相依共終始天地日月非彈

丸環兮環兮冰雪寒

趙氏雙珠辭

遊鯉山石高孱顏遊鯉溪水清洄灣中有峩峩青結鬢望
如春雲不可攀壬辰仲冬寇蜂起乳臭將軍先披靡民人
顛連社稷圯我固當爲貞白鬼後來謂乙未年小妹復被驅亦
葬魚腹全其軀山高水清幾千載虹月夜貫雙驪珠夜深
鮫宮屏機杼風吹草寒髑髏語何由生長江沱間及見王
睢鼓衣羽願回堯天行化日女子有家男有室地下甘心
燈似漆

秦筆妻 并序

江陰縣志

卷二十七

藝文詩

三十六

筆予里人也乙未亂挈妻依同郡朱判官瑤居吳中筆
病卒貧無以斂朱爲具棺衾且思所以卹養其妻其妻
覺泣謝曰良人筆生以藝游搢紳間詩書禮義之教妾
亦與聞之矣妾以未亡存有累於鄉長者在長者義妾
其於義何朱加慰之夜漏半哭益哀遂自經筆死所朱
合葬焉

良人賣筆芙蓉市交接無非大夫士詩書禮義言熟聞冰
霜松柏操奚云亂餘良人死君託恤寡見君尤不惡願君
葬妾良人邊夢中雙報筆如椽

壬辰冬十一月避亂綺山簡邱文中貢原甫二教授

雲掩金戈日風生鐵馬塵亂離誰事主貧賤獨爲民雞犬
人煙絕甃語木石鄰喜聞同舍語天已厭荆榛

儉德堂懷寄二首

并引

完哲清卿江陰上萬戶贈都元帥丑廝公之弟泰州不
守以材請擢萬戶累遷福建參政亂後歸養吳中

喪亂無全室歸吳有大參五湖孤枕月百粵萬山嵐故國
龍移鼎高堂雪滿簷雕籠綠毛鳳默默夢閩南

買住昂霄以江陰副萬戶累遷中政院判官福建憲僉
會亂遂航海歸隱以孝聞

郡邑更新署江山識故侯寸心天北角百指斗南陬月殿

江陰縣志

卷二十七

藝文詩

三十七

金猊曉霜輶白鷺秋書來悟前夢甘脆爲親謀

送郡萬戶尹靜如巡海漕

元勳世胄濟時才金虎三珠燭上台鵲起野田旗影豎馬
穿官柳佩聲來伏波銅柱諸蠻讐下瀨樓船萬弩開饋餉
漕通醕饗暇巫門山築雅歌臺

奉陪貢泰甫侍郎翟仲直州尹邱文中教授遊君山

貢有詩屬逢和

港入黃田似野濠山橫鷺鼻淨江濤珠光夜冷三千履金
背晴浮第一鼈太守政聲南斗逼侍郎辭氣五雲高吳帆
楚鳥來無際愧屬吾儕肆酒豪

書西廈時洪武丙寅沿海築城

牀頭鴟臥久空金壁上
蝸行尚有琴孺子成名狂阮籍
霸才無主老陳琳
虹霓氣貫登萊市
蝙蝠羣飛顧陸林
環海煙沙翻萬鍤
連村霜月抱孤衾

題烈女廟

并序

女何江陰人少
有容操五季時
避亂前湖舟中
賊持兵犯之何泣曰
吾身墮汝手肯從吾禱之於天於父母乎
賊由是少懈何乃起立且拜且祈乘閒竟投水死後里父夢見何曰
吾當血食此地伺湖爲田則廟貌祀我既而果然今廟在華藏寺南郡志所載畧異逢蓋得先大

江陰縣志

卷二十七

藝文詩

三十八

母所傳云

遺廟湖陰四百年
斑斑江竹映嬋娟
魚龍水落萑蒲外
雞犬村成廩柘邊
不待清名垂女史
尙存貞魄降神弦
君王社稷今焉在
伏臘粢盛自儼然
帷箔夜涼臨月榻
佩環晨響起雲輶
湘靈鼓瑟虞風盛
蔡媛聞笳漢鼎遷
嗟彼生還羞故國
何如死節報皇天
明妝靚服黃塵裏
重爲傷時涕泗漣

江邊竹枝詞

游鯉客山高刺雲天
門山小舊稱君插江
鷺鼻移沙脈愁殺浪
撞黃歇墳

亂石呀聲大小灣石中無玉作連環楚江風浪吳煙雨翠
鎖修眉八字山

馬沙十八里江程潮落潮生船送迎南來士氣漸吳習北
下農謳變楚聲

社酒吹香新燕飛遊人裙幄占灣磯如刀江鱗白盈尺不
獨河豚天下稀

南北兩江朝暮潮郎心不動妾心搖馬沙少箇天燈塔暗
雨烏風看作標

巫子驚湍天下聞商人望拜小龍君茹蘆草染榴紅紙好
翦凌波十幅裙

江陰縣志

卷二十七

藝文詩

三十九

君山登覽

貢師泰

孤嶂臨滄海千山湧大江遠帆歸市獨高塔倒波雙鷗鷺
爭洲激蛟龍怒石砘壯遊心未已飛雨灑船窗
畫橋垂柳傍官濠夾岸青山湧雪濤楚相邱墟遺石馬梵
王宮殿壓金鼇天迷鴻雁江流濶風撼魚龍海氣高此日
登臨無限意古今消盡幾英豪

沙上

宋 無

四望無邊際中浮一片沙人居釣艇官賦種蘆花渚綠
紅蒿短江青白鳥斜垂流欲東去萬里寄生涯

題澄江櫂歌

邾仲義

半山昔拜少陵像謂公詩與元氣侔後五百歲無繼者元
氣茫茫散不收我朝詩派因中州氣節首推劉靜修宋季
陋習茲一酒天運亦復詩家流楊趙馬范虞揭歐金華莆
田誰與儔亂來風雅久衰落喜向澄江聞櫂謳澄江席帽
同羊求風塵之表從天遊每和君山老父笛不換華頂仙
人舟有時擊節驚陽侯百怪莫敢窺十洲鯨波可蹈惜沈
劔鼇嶠欲蹋思連鈎澄江浪高江月浮江神迎櫂風颼颼
雲機上割天孫錦底用枯槎橫斗牛放歌濯足銀河秋洄
沿不爲澄工畱誰道澄江淨如練我視澄江直一漚此日
相遭東海頭東海纖塵生我眸醉擊珊瑚碎蓬礫笑委鮫

江陰縣志

卷二十七

藝文詩

四十

珠輕博骰俗淫世靡吾所羞孤鳳默默羣鳥啾夏舩一扣
海能小祖楫載誓天何尤澄江櫂歌歌未休凝碧管弦非
所憂君詩匪予得稱好贈言請視今汪周

江上聞笛

薩都刺

江上何人吹玉笛水冷沙寒龍夜泣鮫人水底織冰綃灑
淚成珠明月高銀河淡淡月茫茫雁奴打更沙渚旁更深
繡被夜寒重明月梅花滿地霜

過光孝寺

秋日畱題翠壁層出山聊近在山僧肩輿又上沙頭渡隔
水人家兩岸燈

秋懷

張端

半生旅邸愁聽雨七夕樓頭偶見星竹樹蒼蒼思故國江
山歷歷話新亭誰家素練敲明月獨我絺衣步廣庭住向
錦城心未樂自緣垂老歎飄零

江南春

倪瓚

汀洲夜雨生蘆笋日出曛曛簾幙靜驚禽蹴破杏花煙陌
上東風吹鬢影遠江搖曙劍光冷轆轤水咽青苔并落花
飛燕觸衣巾沈香火微縈綠塵春風顛春雨急清淚熒熒
江水濕落花辭枝悔何及絲桐哀鳴亂朱碧嗟我胡爲去
鄉邑相如家徒四壁立柳花入水化綠萍風波浩蕩心怔

江陰縣志

卷二十七

藝文詩

四十一

營

居竹軒

翠竹如雲江水春結茅依竹住江濱階前迸筍從侵徑雨
後垂陰欲覆鄰映葉黃鸝還共語傍人白鶴自能馴遙知
靜者忘聲色滿屋清風未覺貧

張藻仲畱飲草堂因賦

爲愛城居似野居女蘿緣徑水循除博山雲霧尊中酒庭
竹風翻榻上書已覺新涼生筆硯也知遠興到鱸魚秋來
白羽非無用攬轡澄清志不殊

江陰吳士明花園

馬肅

松風微動涼生座竹雨初收青近人日日憑軒舉春酒不
知朝市馬蹄塵

虛亭面面壁玲瓏庭下遊魚白間紅久坐不知香霧濕竹
闌干外藕花風

寄王梧溪

張 昱

仙舟曾記過南塘鳴鳥高梧日正長蝴蝶重來春夢覺牡
丹欲盡燕泥忙當時賓客知何在此日音書或漫忘猶有
白頭王粲在獨將詞賦動江鄉

吳將軍鎮守江陰

明 劉 基

將軍少年才絕倫丈八蛇矛弓六鈞銀鞍駿馬馳絕電出

江陰縣志

卷二十七

藝文詩

四十二

入戰陣如有神千年鼻祖西河守文治武功無不有堂堂
魏國一長城虎視秦人畏東首篋中兵書幾萬言上溯呂
叟窺軒轅運籌決勝帷幄內將軍勇畧真其孫將軍知謀
天所啟源泉淵淵海無底三軍側目避威風矯矯難兄更
難弟晉國元戎偃與毛漢家二耿同英豪今者將軍又儷
美騰陵不覺蒼山高憶隨真主過江左身披重甲黃金鎖
援矛陷陣無勅敵引滿射生須沒筈躍如雙龍出海雲撇
若兩鶻穿鷓羣一呼萬馬皆辟易一鼓四野開稜氛揮戈
自是迴日手戰勝論功獨居後要令聲名繼大樹肯使煙
塵驚細柳江陰地連吳會長熊羆當道狐狸藏層城粉堞

靜笳角平田白水安耕桑皇天無私德是與以德保民人
孰禦棟梁楹桷要相扶勉爲蒼生慰延伫

里巫行

高 啟

里人有病不飲藥神君一來疫鬼卻走迎老巫夜降神白
羊赤鯉縱橫陳兒女殷勤案前拜家貧無穀神勿怪老巫
擊鼓舞且歌紙錢索索陰風多巫言汝壽當止此神念汝
虔賒汝死送神上馬巫出門家人登屋啼招魂

春申君廟

封吳開巨壤相楚服強鄰名重三公子謀疎一婦人畫幃
畱古像珠履絕遺塵簫鼓時迎祭還憐舊邑民

江陰縣志

卷二十七

藝文 詩

四十三

江陰老人謠

汪廣洋

江陰城中頭白翁面皺脊曲雙耳聾手扶竹杖官道側向
人欲語捫心胸自言往昔承平日老夫城中家富實一從
浙右干戈興官稅差科日繁劇大兒從軍行小兒應夫役
幸有老夫存連年避兵革戎兵旣退海寇來江陰城中生
綠苔人心反覆七變易殺人何異誅蒿萊去年自逢吳總
兵與民爲主民獲生官軍不擾民樂耕大開濠塹堅築城
老夫縱老何足惜願與聖朝歌大平

琴月堂

莫士安

花裏琴堂清晝長桐絲曼指鳴秋商心澄慮淨公事簡拂

絃轉調頻更張蓮花滴水泛壺箭刻漏遲遲坐忘倦冰輪
碾月上天東金粟吹香滿深院美人手勢高復低絃聲彈
作烏夜啼須臾流響換音節丹鳳肯逐孤鸞栖湘波畫簾
玉鈎小卷舒不隔光皎皎兔擣元霜雲動搖蟾浴銀河影
顛倒夜涼零露沾裳衣自憐曲終知者稀武城絃歌世應
少單父政治疇能希於戲武城單父兩奇絕莫惜對此江
陰堂上月

溪上偶興

張宣

丹峰血染霜前樹回首千山萬山暮水亭隱映隔江村茅
屋幾家山下住長風吹落松際雲笑倚青天數歸鷺漁歌

江陰縣志

卷二十七

藝文詩

四十四

樵唱總堪聽秋色茫茫不知處

染絲行

吳蠶吐絲白於銀染絲上機顏色新往來拋梭不停手及
時花樣隨他人以色媚人人見喜不惜蘭房勞玉指莎雞
弔月鳴夜鳴杼軸啞啞淚如水明日彤庭促功賞輸官不
得虧銖兩績麻成布自可衣染絲莫上寒女機

哀李士龍將軍辭

盤槩烏龍敵將擒解鞍白馬矢痕侵江山漫灑新亭淚天
地空懸卽墨心仰藥自甘酬萬死砍頭誰許購千金錦沙
泉上新封樹落日蕭蕭起暮雲

琳西玉血書華嚴經報母

上人苦行滅根塵曾是華嚴會上人指血盡成功德水新
恩難報去來身天香圍繞神龍護金色鮮明字畫勻鹿野
拔提無一語始終經教總非真

陪周伯溫左丞春游次韻

官河流水又春波流盡興亡事幾多忍見義熙書甲子已
聞聖德頌元和數莖白髮何須染一寸丹心未肯磨零落
館娃宮畔月當年曾照美人歌

馬沙口號

蹇驢馱醉過西沙港口歸來喚踏車望隔江城雲樹近寺

江陰縣志

卷二十七

藝文詩

四十五

樓東畔是吾家

吳將軍鎮守江陰

陶安

二百年前說兩吳中興功業滿邊隅弟兄今復爲良將英
勇俱能敵萬夫怒斥鯨鯢并巨海平驅士馬獵姑蘇無心
宴樂軍中肅要挈山河入版圖

邱氏故園

孫作

魏公大府司農居園出東廂百步餘兩朝文獻子孫盛萬
卷詩書兵火俱舊聞長老爲言此昔時相府今存幾獨此
僻在滄江濱似有神靈相其氏茫茫天運不可推太息平
泉草木非曩者大官三四葉近者勅命猶相輝兩園何事

苦變革松檜蟻鑽唯菜麥冰壺水闌鴟伺魚芍陂稻田牛
負軛我慚不至驚十年歲月輪雲心惘然亭子當江望由
里兒時憶上假山巔嶙峋怪石森相向珊瑚柯長海柏連
臥草同歸一長歎靈壁何年到日邊金莖此際承天上東
家新亭花滿園寸田尺地百金買看花一月人爭傳世間
萬事無不爾鏤石鑿金安足恃荊州不出二百年桃源那
得三千歲文章事業差可遺宇宙高名終古垂隆中草廬
蜀主到揚雄舊宅西人知田荒室空紛感激操鎧再過空
四壁祇有南陽白帝城薄夫起敬尊故迹長歌自作還自
吟美酒得錢須爲斟有懷莫挂度外事畱眼坐看梅天霖

江陰縣志

卷二十七

藝文詩

四十六

天壽觀竹鶴軒

饒元德

當時仙人愛邱壑賸種琅玕招白鶴縞衣夜映月華明翠
葆朝凝雲氣薄琅玕可種鶴可招青天歌罷鳴鸞簫卻慕
燒香清隱士絕似吹笙王子喬王喬清隱不易得二仙已
去無消息白鶴飛衝丹鼎煙繞屋簷簷蔭秋碧我今來作
江陰令每羨幽軒出高迴幾迴彈罷紫瓊琴風散天香虛
室靜

踏車謠

張庸

高田水低田水田田積水車不起去年因水民薄收今年
多水朝廷憂岸圩自是農夫事工程賴有官催修東家婦

西家婦喚郎去鬪荒邱土車溝昨日裏外平斷塍急待新
泥補踏車正忙兒又啼抱兒踏車力不齊車踏不齊車擦
軸軸轉橫牙婦傷足婦忘怨嗟撫兒哭水深未易乾恐郎
受笞辱願天早晴祛雨陰入夏無苦旱至秋無苦霖上寬
天子憂民心吾農飽煖長謳吟

送別何竹鶴

陳 耘

莫歎南歸道路長攜家此去入仙鄉行隨流水尋花徑閒
向青山卜草堂自有雲林成隱逸儘教兒女樂耕桑知君
得此恩非淺惜別何須淚兩行

贈包司訓時解職歸武林

賀子徽

江陰縣志

卷二十七

藝文詩

四十七

暫喜公庭事不關看山偶共白雲閒好風卷雨溪頭過明
月隨人馬上還驛舍自憐長送使山林誰似早休官武林
詩伯推包氏辭疾歸來鬢未斑

賀趙孝子旌表

蔡 景

砂阜孕奇璞秀出芙蓉青泉深白龍臥林靜元猿鳴偉哉
趙孝子山水鍾奇英祖父昔邁亂身殞家亦傾時方居襁
裸萬死潛孤形艱危脫虎口家眾惟有承匪依姒氏姑保
抱誰能成恩深教仍立榦絕根復萌時平返故里田廬欣
再營居安心轉惕母氏嗟曷迎陟岵望南北東西邈難憑
精誠貫金石一念微杳冥音傳思殊亂指嚙神亦驚孤衷

日皦皦片影雲惇惇履經羣巘疾葦泛洪濤輕彼蒼竟垂
憫默俾之四明一朝忽相遇離思如春冰綵衣照吳越白
髮還家庭熙熙復皞皞此樂孰與并陽春浩無涖寸草伸
微情穎羹奉彼適羲馭馳莫停霜萱委晨砌風木悲秋聲
攀慕劇號顛寤寐瞻儀型孝行世所重幾人能力行黃泉
已埋骨青史常標名天恩錫旌表里閭生光榮寥寥朱康
叔千古堪同稱作詩告來世俚語非無徵

賑饑詩

周忱

蕭蕭匹馬過江干滿目饑民不可看十里路埋千百冢一
家人哭兩三般犬銜骸骨形將朽鴉啄骷髏血未乾寄語

江陰縣志

卷二十七

藝文詩

四十八

當朝諸宰輔鐵人聞著也心酸

艱難百姓實堪悲大小人民總受飢五日不燒三日火十
家常閉九家籬隻鷺止換三升穀斗米能求八歲兒更有
兩般堪歎處地無芳草樹無皮

遺廖大理三首

顧琳

幽懷怒如擣奮欲飛蒼雯冥冥望無極浩蕩風披雲之子
在萬里哀鳴九天聞羣角散濺濺眾翼迴紛紛當塗總翕
忽失路空悲欣以我耿耿憂知君日殷勤所恨爲力弱恥
從驚馬羣何時一振衣聊以樂我員

孤雁歸南國翩翩起高翔引領忽不見涕泗沾我裳吳水

深萬丈欲濟川無梁我欲從之游改轍登高堂徘徊衢路
側仰見日月光

氣清天宇高心寂塵累空木落山獻體波縮沙畱蹤明滅
固有時容色如飄風欲行似違俗欲止非令終爲詩寫幽
尚抱恨恆忡忡

何竹鶴山水

卞榮

袁州太守何其賢鳥中之鳳人中仙眼空四海胸雲夢懸
車早賦歸來篇鋤雲自種三徑竹養鶴只買二頃田明窗
淨几拂縑素興至落筆生雲煙雜花幽草各縛麗蒼藤古
木相鉤連雲門若耶在織末咫尺弱水蓬壺天吾鄉風流

江陰縣志

卷二十七

藝文詩

四十九

徐孺子太守下榻三年前青絲玉壺送春酒碧桃花底開
瓊筵醉傾墨汁如流泉幻出斜川及輞川分明孺子卜築
處牽蘿補茅三四椽左圖右史看不厭光風霽月心悠然
逍遙莊叟室虛白澹泊揚雄草太元蹇予買鄰乏百萬所
蓄舊物惟青氍肩輿數許造竹所江空歲宴相周旋

遯菴

顏瑄

生不願釣位沽名竊天祿苟蠅營事追逐又不願粟陳
貫朽饒餘資狼貪虎噬窮刀錐但願有田可耕廬可居有
山可樵溪可漁一壺坐酌花下酒一編靜閱窗前書任教
蛇豕自吞啖不管烏兔爭馳驅是非回首兩無競方寸灑

然涵太虛人生如蜉蝣天地真蘆廬百年寄寓在瞬息何
乃僕僕勞奔趨豈不見鄖塢黃金等灰土到頭莫救燃臍
苦又不見金谷名園安在哉悲風落日生蒿萊繁華草頭
露富貴空中雲咸陽黃犬歎應晚華亭鶴唳難再聞誰似
林泉獨能久寵辱不驚成皓首青門曾隱種瓜人商嶺能
藏采芝叟鹿門亦有龐德公至今清節垂無窮南州更聞
徐孺子遺名萬世稱高士箕山不改色桐江有餘清江山
風月曠已久只今盡屬黃初平黃初平在何處小山叢桂
秋正香萬里天風獨歸去

郊行卽事

黃 傅

江陰縣志

卷二十七

藝文 詩

五十

枯茅三四椽黃土一兩堵中有白髮翁累累織麻屨將謂
營朝夕乃以輸官府昨日設公燕高堂陳鼎俎食前方數
丈吹笙擊鐘鼓里胥叩我門咆哮怒如虎賣屨典春衣出
銀二錢五我聞長太息垂頭不能語去去趣歸來村村省
編戶

公事駐奉先庵

曲籬幽徑野塘濱有此僧廬經幾春庭柳分陰青動壁牆
花含笑媚窺人牛羊出沒東西巷雞犬相聞南北鄰隨俗
耕桑隨分足那知不是葛天民

題芳草窗江灣小桃源

湯 沐

誰將小島擬桃源
箇裏分明隔世喧
花謝花開還甲子
潮生潮落自朝昏
幽亭結縛無多處
老我來遊已二番
地主多情成久戀
東山莫作謝公墩

秋日寫懷

黃菊年來頗寄思
青山於我久相期
孤燈對酒不成醉
遠道逢秋更覺悲
祇恐病侵垂老日
不妨貧過未官時
沅湘欲趁東歸棹
竹杖芒鞋任所之

贈楊升庵

黃 昭

昔在長安日相逢
各少年雲隨香案吏
風送玉堂仙漢檻
星辰動秦臺
日月懸疎狂仍故我
春興滿南天

江陰縣志

卷二十七

藝文 詩

五十一

病起赴部逆瑾啖以美除要賂不得矯制免官

夏從壽

蕩蕩清時放逸民
從容畎畝自由身
風清月白原無禁
水釣山耕別有春
獨幸老樗今可免
敢如尺蠖更求伸
平生一日三公意
且得登堂拜老親

送黃小江僉事還廣州

湛若水

弱齡塵外志點也
與爲徒微尙夙所敦
俛仰一紀餘傷哉
力不競淪落在泥塗
中夜起興歎攬衣步
前除咎已有餘裕
尤人尙憂虞行年四十九
將與伯玉俱知非
在今始言爲知者據

挽徐孟義

貢安甫

簫鼓元宵滿市城朝來忽報薤歌聲竹窗秋月何人讀藥
畹春雲有子耕枕上鹿蕉今日夢酒中山水舊時情梅花
亂落江天杳愁聽西風獨雁鳴

江陰寓舍漫興

徐淮

窗前數株柏峩峩古衣冠對客無媚容鐵面霜雪寒海樞
不自持隔牆索人看如何路旁子真意傾柔曼
山鳥集庭樹顧我畱好音迂疎脫機巧微物知此心呼童
具杯盤自聽還自斟酒盡忽飛去悵望煙雲深

沿溪探芳杜香氣襲我衣貪得不知厭竟踏明月歸空堂

江陰縣志

卷二十七

藝文詩

五十二

燒短燭餘情付清徽曲罷發長歎此意識者稀
讀書茅簷下古道照我顏掩卷思古人邈焉不可攀當夕
屢廢寢當晝屢廢餐浮辭炫俗易實理躬行難
寒士多局促我顏獨軒昂甘爲珠玉捐羞作瓦礫藏落落
青松軀凜凜寒雪腸百年天地間俯仰有耿光
迂疎畏炎暑散髮修竹林綠色豁病目清風滌煩襟好詩
節間題濁酒葉底斟古賢不可起勝會難重尋

修圩歌

姚文灝

修圩莫修外畱得草根在草積土自堅不怕風浪喧
修圩只修內培得腳跟大腳大岸自高不怕東風潮

教爾築岸塍築得堅如城莫作浮土堆轉眼都傾頽
教爾分小圩圩小水易除廢田苦不多救得千家禾

吳農開河謠

遠堆新土纔稀罕盡露黃泥始罷休兩岸馬槽斜見底中
間水線直通頭

開壩歌

開河容易壩難通我有良方不費工壩裏掘潭寬似壩卻
疏餘土入其中

歸興

方謨

渡水試褰裳看山索吟屐初景正晴和小蓮貼新碧

江陰縣志

卷二十七

藝文詩

五十三

二島

文徵明

雲白江青水映霞夕陽欄檻見天涯亂帆西面浮空下蒼
島東來抱郭斜萬頃胸中雲夢澤一痕掌上海安沙扁舟
便擬尋眞去春淺桃源未有花

蘭陵舟中與湯右卿話別右卿大理公嗣也

邂逅蘭陵話日斜追思京國困風沙扁舟又是三年別尊
酒空驚兩鬢華敢以虛名傾晚輩曾從諸父說通家秋來
何事匆匆去孤負重陽菊有花

養鄉兵行

沈翰卿

胡爲去歲招廣兵往回崎嶇萬里程羽書在案金在橐遠

勞五馬揚雙旌十月方臨東海畔祇與倭奴一交戰偶然
乘隙一小勝厚加犒賞煩州縣其如日本兵最強諸島截
棄在海洋結連獐獠并內寇爲患中國殊難當招兵本爲
滅倭賊誅勦數年猶未得山東鎗手已逃潰廣兵望爾能
宣力日隨參將聽指揮住劄在我江之湄受圍已是經旬
日眾論宜乎一出師縋下南城纔咫尺海螺一聲驚失色
蒼黃分道各東西昏夜來歸如避賊白金數錠一卒貲可
憐盡是民膏脂危如倒懸不能救豢養此輩將何施精兵
士兵皆土著更有鄉兵能截殺鬪體手斬血淋漓縣令受
之報臺察軍前尤喜得生擒勝捷佳音日復聞各兵奮勇

江陰縣志

卷二十七

藝文詩

五十四

皆併力首級頻提送我軍前有七顆今十級幕府榜文懸
賞格論功已讓南陽子路有人行無虎跡廣兵半入倭黨
中存者勿能成戰功淹畱漸覺年光換坐食常令帑藏空
有粟一斛繒一疋散與鄉兵感尤切可保鄉兵無陷失免
使天地日流血

輓大理湯公沂樂

不負皋陶直中宵見法星清霜照肝膽白日犯雷霆廊廟
懷殊寵江皋養暮齡漢文終有道無賦弔湘靈

哭邑侯錢鶴洲先生二首

墮地郎星六月寒空憐儒將氣桓桓肘間猶自懸金印天

上那逢降玉棺三館史編濡筆待百年臣節效公難城隅
翼翼翬新廟老稚相攜淚不乾

已有封章達九天行頒卹典賁重泉長江落木浮歸鳥故
國寒花泣杜鵑慈母更添新白髮靈帷惟設舊青氍重收
正氣還光嶽張許何須論後先

飲二島

陳皋謨

策杖攀蘿徑尋幽過草亭片帆衝雪浪獨鶴下雲汀水落
石全出詩成酒半醒憑欄時極目天外一峯青

陝州道中懷劉應谷年丈

一揮新領下中州匹馬函關思轉悠正憶省闈同日宴獨

江陰縣志

卷二十七

藝文詩

五十五

教書劔異鄉遊天連紫塞風塵迴地帶黃河日夜流南北
浮踪那可定朔雲煙樹總離愁

題何廷濟所藏竹鶴老人畫卷

徐經

袁州太守人中龍千秋御氣遊鴻濛飄然滄海不復返尙
畱遺跡藏崆峒素綃咫尺恍瑤圃萬壑雲霧生虛空懸想
當時下筆處十日解衣盤礴中盡超三昧了無事婆娑九
十稱仙翁流傳數世永弗替神物呵護傳無窮

夜泊長壽橋

李宗

寥落難禁客裏情隔溪漁火照深更僧歸古寺鐘初動人
在孤舟月自明野徑雪晴梅有信海天霜冷雁無聲蓉城

咫尺家園近且對篷窗酒漫傾

敵山雙林庵

山有女
仙臺

徐尚德

金鐙斂微光欹枕睡方熟夢遊仙女臺風濤滿雲谷手把
蒼精龍身騎雪色鹿煙開石壁青袖拂松梢綠仙姬杳無
踪曉鐘迴夢速

莫城耕者得石箭鏃示予蓋千年物也此處乃南唐
藩將莫寵戰死之地舊聞紅光射空人謂莫城劔
氣今卽物有徵賦詩傷弔

南唐霸氣斂江東藩將誰知有莫公金鏃射殘猶鍊石丹
心歷盡化成虹麒麟曾繪千年閣狐兔嘗穿半畝宮自昔
江陰縣志

卷二十七

藝文詩

五十六

英雄只如此可堪揮淚弔孤忠

送劉克柔戶部

殷雲霄

三月寒如此海濱春到遲無因芳草別况是落花時南國
征徭急中原鼓角悲今朝詎離恨歸思繞天涯

寄題高曾唯君山別業

李夢陽

一山背城起萬古號爲君秀攬江心月輝吞海面雲金陵
通地脈玉港發人文羨爾投簪客中年臥紫霧
季札墳邊業春申邑後山一江平展鏡兩港曲成環不雨
雲煙擁長春草木斑隱君梯萬丈尙許世人攀

秋夕懷江陰曹毅之

何景明

百卉飄零盡孤鴻何處歸高樓橫暮笛萬戶搗寒衣南國
江潮遠佳人尺素稀獨愁誰與晤明月鑒重幃

懷古二首

曹宏

郭璞並江畱故宅庾冰窮巷有沈碑詞源共繞江聲轉談
柄空隨玉樹埋景物漸催山色暮風流真與古人違憑君
苦放尊中醪一洗清秋萬古哀

延陵墓繞大江回孔氏親題十字碑蝌蚪真疑三代近麒
麟應控百蠻來春秋筆在光千古伏臘時聞奠一杯欲識
大賢名不沒濤聲相續古今催

精衛謠

沈冲頤溺海死妻
錢氏年十九守節

薛章憲

江陰縣志

卷二十七

藝文詩

五十七

海水日夜度豈畏雙翅折山石日夜銜豈畏孤吻裂石頭
嶢嶢水活活羽鍛眼枯皆流血但願高山石化爲平行疇
但願滄海水化爲清淺流山高水流有盡頭妾心未遂未
擬休

石堰塘觀漁

石堰瀾瀾浩千頃縹渺三山螺髻並居人聚落江湖迴出
沒煙波弄漁艇黃蘆雪色覆屋廬青山當門畫不如鳴榔
鼓柁行打魚盡日來往無閒居平生踏浪如踏土中流一
葉從掀舞得魚湘之錡及釜生事只知操網罟碕岸斗入
生盤渦腳扣兩舷唱漁歌斜風細雨濕綠蓑獨宿船頭舞

傿傿

嘉遯山居

枳籬茆屋並山椒入郭都無十里遙
拂石閒攜桃竹簞臨流仍榜木蘭橈
雲間穫稻畱遺秉月下烹茶拾墮樵
擬卜幽棲定僑札超然肥遯絕紛囂

虎跑泉

沈周

定山有古寺廢址垂千秋昔人去云遠
虎跑泉尚流緬懷宋先哲結亭泉上頭
有美稚川孫蒼復追前修時來聽泉鳴
夏擊鏘琳璆下瞰一泓碧心境同悠悠
返本當還源樂哉在斯邱天地猶傳舍
日月無停輶願言亭不壞永鎮茲

江陰縣志

卷二十七

藝文詩

五十八

山陬

寄贈許漚沙

唐順之

雨過草木好夜來池館清露蟲疑獨影
風樹答書聲似瓠甘無用爲羶厭有名
且師河上叟毋使慮縈縈

補衣

朱承爵

駝衣衣我十年餘蠹食成行學篆書
每爲擁吟畱野寺幾因沽酒典村墟
衝寒出郭籠雙袖冒雪看山曳後裾
試倩山妻聊補綴牛衣雖好恐難如

君山晚渡

冷宗元

落日黃山浦輕帆綠樹斜江浮漁火
岸城俯馬馱沙拂雨

禾千畝籠煙竹幾家海天長嘯處吟興浩無涯

曉霽

吳惟嶽

夜來鳴雨淨蒿萊雲日晶晶爽氣來齋閣平臨山岫敞藤
花半繞竹牀開心閒欲著齊民論政暇頻登望海臺秋水
鱸魚時得買一官真可隱微才

江上感懷

任環

去年走馬燕山道今日驅兵江海涯三尺龍泉書萬卷丈
夫何處不爲家
放船中道轉狂風雪浪排山一點篷宴寢先生明旦死安
危不在海濤中

江陰縣志

卷二十七

藝文詩

五十九

季子墓

李元陽

何事春申國能存季子墳孤巒蒙弱柳虛閣入流雲天地
徐君劔江山魯聖文千年吾酌酒藉草坐斜曛

餞同年薛畏齋

羅洪先

送君不忍別酌酒暫爲歡塞馬誰論失江鱸亦可餐買田
多種秫養竹自裁冠倘遇南來雁因風托素翰

澄江草堂夏景昭索賦

湯允勳

芙蓉城北大江邊矮縛秋風竹數椽脫繫久忘蒼隼累息
機新慕白鷗緣清詞激響佳人齒故態高齊處土肩目斷
海天三萬里一聲蘆捲木蘭船

前題

聶大年

愛汝澄江草堂靜旁人錯認浣花莊門前小徑通花隴柳
外春陰壓釣航醉眼看山烏帽側行厨臨水白魚長鳧鷗
鷗鷗淨相對碧樹無風也自涼

三月八日登君山

張袞

燕麥青青雉子飛偶來江閣覽春暉花洲曲曲通深隴松
殿層層出翠微蜃氣半籠黃鶴嶺海潮初浸白鷗磯山中
日有看花伴信是閒身願不違

錢侯遇害馬卒楊成衛之同殉

薛甲

良知原不隔勇烈見楊成有役聊從主無求肯殉生英靈

江陰縣志

卷二十七

藝文詩

六十

回赤日風雨慘長汀千古誰知爾丹青爲紀銘

倭寇薄城被傷而死者百二十餘人買地西城葬之

因弔以詩

眾生生亦死爾死死猶生斜日暨陽道秋風薤里情蓋棺
時草草掩骼我惺惺知爾餘英氣椒漿酌九京

時事

畚鍤趨公擁若雲導河銀兩只空聞年年編牘徵收苦開
濬何曾動一文
官倉有額稽官稅水利何人問水曹潮水一潮沙一簸至
今沙比水痕高

飲季連江清機園

劉光濟

最愛名園勝幽深
隔市塵穿林過佛寺
問渡上漁船
曲徑花間路
行厨竹裏煙
桃源何處是
相望赤城邊

遊顧山寺

山屬江陰金匱常熟三縣名三界山

井邑連三界
招提控上方
山臨平野濶
路繞澗流長
樹古含靈氣
樓虛接混茫
來遊春色晚
花雨散空廊

憂南中

陳體文

黑船城下泊紅旗
城上顛船上賊作樂
城上官搖扇不敢發
一矢焉敢出城戰
任賊掠船滿順風
帆片片帆遠始開
城揚兵耀組練
飛報已驅賊堂上
大開宴

江陰縣志

卷二十七

藝文詩

六十一

賑饑行

萬家無煙麥未熟
太守念民思賑穀
移文給下二千石
一縣有鄉三百六
里胥報名入城市
扶杖隨趨束飢腹
縣官事多未點名
今宵且向階頭宿
天明乞食人未有
日出開倉吏催走人多
穀少給一斗上階
吏胥更索酒老婦
村邊望何久遙見
歸來若空手翻身
入門掩淚泣徐聽
翁呼借鄰曰傾囊
莫恨白不盈我猶
得歸米入口請看
城中廣福寺寺前
多少飢民死

定山寺

姚廉敬

古寺不知何代劫
我今重見道場開
一潭秋水毒龍臥
十

里長松野鶴來花落自尋方丈室月明還上眾香臺遠公
一去應難覓細讀殘碑剝古苔

九日黔江官署雨中思故鄉菊

薛如洛

黔江漠漠已深秋薄宦聊因五斗畱俯首醉聽嚴武令傷
心閒賦杜陵愁幾回欲濕尋花屐無那空登對月樓何處
籬邊堪脫帽相期終買季鷹舟

詠史感事

黃道

游魚潛重淵飛鳥鳴高樹物處固不同各適性所嗜叔世
多貪夫勢利乃深恣豈無高潔者洗耳上古世去古未云
遠蓋有季札氏千乘一羽輕掛劍心可識觀樂識至理結
江陰縣志

卷二十七

藝文詩

六十二

好盡奇士翱翔上國間豈問王僚事先有大聖人遺碑表
十字我生延陵鄉感此隕清淚傷弓且高飛驚餌亦深逝
安敢踵餘躅偶爾同意氣

春日友人邀登君山

君山差峩半倚天乘春臨眺山之巔東風悠悠亂帆沒海
燕飛入蘼蕪煙王孫開宴向江渚招攜江畔同心侶舉觴
睥睨青天低世上浮名何足語曾聞昔日春申君賓朋珠
履日滿門百萬貔貅此山駐雄名英氣孰可倫一朝流血
棘門上惟見此山今獨存楚水流聲尚嗚咽吳墟誰復招
游魂吁嗟俠骨今黃土何如我輩酣金尊狂歌起舞與君

樂吾徒酒人殊不惡長願登山醉不醒肯向風塵悲寂寞
遊歸雲洞桃花澗

秋暑初消玉宇寒登臨尊酒足盤桓石疑虎豹巖前踞松
作虬龍澗底蟠落日射波迷海色長風吹雨過江干喜逢
地主陳遵在投轄堪畱信宿歡

鄉社

曹驂

春風依舊一青氈社鼓神歌又長年芳草碧梧盤馬路冷
雲淒雨賣錫天山櫻成果行堪摘溪女畱魚射得錢處處
桑麻春酒熟石郎廟下起楓煙

江曉

沈奎

江陰縣志

卷二十七

藝文詩

六十三

積雪迷遠汀山光半吞吐飛虹飲長江先收夜來雨輕颺
揚素帆朝曦入村塢山水足娛人扁舟羨漁父

贈邑明府胡爾潛

王穉登

河陽縣裏借詞臣文采葳蕤自七閩馬首殘碑題季札松
間濁酒奠春申濤聲賦就稱才子麥穗歌成徧野人原是
玉皇香案吏折腰非久在風塵

頌任兵使

任公瘦骨氣蕭蕭亂後瑀弓卻在腰銅柱未曾標馬援玉
門早已入班超孤身去國心應折羣盜經時氣轉驕聞道
墨纒重奉詔佩刀騎馬答清朝

送吳中丞之金陵

建業青山是帝都，暫勞開府握軍符。
花間朱鷺鏡歌曲，江上黃龍水陣圖。
玉節中丞新盪寇，樓船諸將舊平吳。
不知燕子磯前地，容得陳琳草檄無。

胡爾潛招同馮開之登君山

暮色蒼黃滿碧窗，平沙漠漠鳥雙雙。
奇峯幻出雲臨檻，遠黛浮來樹隔江。
馬走史公聊玩世，牛刀仙吏善爲邦。
雄圖欲起春申問，何處松根酌玉缸。

雪湖新漲行

季科

一夜江皋梅雨足，七尺湖波鴨頭綠。
曉攜鳩策向藤蘿，殘

江陰縣志

卷二十七

藝文詩

六十四

滴濕衣穿六曲長，煙窈窕度湖隄。
雲水蒼茫一望迷，四面白埋塘岸潤。
半腰青漲雪峰低，妙高樓臺何縹渺。
赤霞幻出蓬萊島，水晶簾影浸菱花。
一髻青螺望中小，清涼好結瀟湘游。
瀟湘九夏疑新秋，沙棠之舟木蘭楫。
朱絲翠管浮中流，是時荷花香尚淺。
芷蘭未茁蘆芽短，浴鷺眠鷗了不驚。
采蓮隔浦歌聲遠，尋聲撥棹過重灣。
溪外藏溪山復山，北溪樹接南溪秀。
山上雲連山下閒，秀樹閒雲行處有五侯。
不換綸竿叟十年塵土夢，中過此日扁舟落吾手。
扁舟只合住蘼蕪，鑿得桑田作具區。
滄浪不用一錢買，底事山

陰乞鏡湖

夏日過黃橋

淺浦蘆花出蔡涇石梁潮長木蘭輕一番涼雨釣絲亂何處晚風漁笛清雲外水莊剛十里渡頭烽火欲初更榜人不睡算程到自唱楚歌搖月明

七夕聞菴梁使君招游黃山新港

禹疏遙接大江東秋淨長河貫白虹煙樹萬家揚子渡雲帆千片廣陵風珠犀漸作津頭市樓觀將成海上宮賈客鮫人紛出沒不知誰是濟川功

改葺山園二首

點蒼攢翠抹芙蓉三十年來畫始工雲裏架梁峯勢接石

江陰縣志

卷二十七

藝文詩

六十五

邊穿竇水聲通樓開佛國諸天淨秋老霜林萬樹紅好向上頭凝望眼扶桑只在海門東
不葺清機向廿年探囊羞乏買山錢懸崖破屋牽蘿補斷岸危橋斫竹編谷口盡隨秋水沒松梢直與白雲連從今點綴都除卻漸覺幽居近自然

織蒲扇歌

鄧欽文

桃花雨餘蒲葉長江風獵獵春渚香渚邊小舟絕輕快競剪綠雲繞村賣村莊女郎巧思多織成花樣勝越羅湘波一片凝寒碧應手微風動瑤席綵絲雙縷纏柄枝題作鴛鴦寄所思

遊顧山寺

野寺藏深木疎鐘落翠微鳥窺齋鉢下花傍講筵飛古壁
題畱偈閑牀坐息機生平慕元度垂老說皈依

張陽湖孝廉招遊天臺石屋

老大徒爲汗漫游家山應笑未探幽峯盤紫翠千重出江
入空濛萬里流石窟何年開鬼斧桃花二月引漁舟今來
好共煙霞臥咫尺仙踪亦易求

過顧山寺次韻

史 鎰

醉策青藜杖因過水寺西石苔春雨滑潭樹暮雲低磬斷
僧初定花深客欲迷閒行忘近遠隨處聽鶯啼

江陰縣志

卷二十七

藝文 詩

六十六

送鄧鴻臚宏載使嶺南便道歸省

于慎行

新柳依依日半曛王孫函檄下氤氳龍江色映題橋字彩
筆寒生諭蜀文驛路諸侯爭負弩陽關一闕怨離羣斑衣
進罷金莖露采得風謠好獻君

秋季君山閱武感賦

張繼孟

爲愛君山問所因人言曾此住春申霞飛橫野開嵐嶂地
引長江盪海濱幾處蒙茸紅葉樹一聲欸乃碧雲津倚闌
俯視川原小不覺飄然遠世塵

題薛夏漪歸來亭

居 節

絳帳懶傳經歸來隱一亭暗潮通藥畹踈樹帶春星徑有

新栖鶴囊餘舊照螢君山秋雨後浮動四檐青

夜過百丈湖

姜從周

澹月寒雲合西風短鬢翻扁舟回白蕩小雨送黃昏宿雁
羣驚櫓歸鴉獨認村微茫見漁火隱約到柴門

過鄰園有感

張純臣

歌舞名園徧綠蕪層樓猶傍紫霄孤昔爲謝傅圍棊墅今
作黃公賣酒壚松慘夜烏聲斷續池悲春柳色凋枯懸知
自古多興廢金谷平泉總浪圖

黃志善園居葺成

名高叔度總能文薙草爲園興不羣近起房櫳俱映竹舊

江陰縣志

卷二十七

藝文詩

六十七

栽松桂正連雲花深卻辨仙源入地迴還疑谷口分落日
一樽池上酌歌來白雪當南薰

君山望孤山

鄧汝楫

巨浸兼天一粟畱吐吞潮汐湖中流平沙煙樹三江鎖絕
壁雲巒片玉浮渡口亂帆移曙色海門輕霧散春愁不知
世上風波險祇有鷗羣與釣舟

題許伯清維摩室

宦進

詩習陶韋帖有顏怕沾煩惱借參禪法華妙義經還注金
粟如來影亦傳一炷夜香葱嶺月半甌春茗雪山泉齋頭
不息琉璃火且讀吾儒未了篇

題曹烈女卷

周俊

曹家有女年十七一片貞心如鐵石字夫未嫁夫忽亡吞
聲哭泣摧肝腸孀姑垂白北堂上卽死誰能爲姑養誓將
堅節挽頽風剖破如花滿鏡容養姑百年遂夫願地下隨
姑見夫面青山峩峩冢不孤一雙比翼飛鷓鴣嫦娥爲惜
冰心苦分得清光照今古讀書食祿稱丈夫朝秦暮晉胡
爲乎

秋夜登君山潮音閣

潮音高閣翠微間石磴殘陽客共攀沙漱煙生浮落木海
門雲淨見孤山亂帆歸浦燈千點雙鶴巢松月一彎滿地
白雲堪醉臥清樽良夜竟忘還

江陰縣志

卷二十七

藝文詩

六十八

周文襄公祠

沈鷺

祕書增秩盛名高秉鉞東南識俊髦疏鑿川途通國運浸
分溝澮節農勞北來春淺櫻花潤南下秋深白鳥號父老
只今猶賽社采蘋祠舊落江皋

題道成墩

十尋蒼翠盡松楸欲訪飛鳧問去畱棲鶴自餘花颭月斬
蛟空憶劒橫秋微薰道氣非凡骨解得仙班最上頭此地
有人傷寂寞種桃千樹作丹邱

江署感懷

駱駿曾

春雲初傍舞衣斑轉怪風塵損壯顏懶性自嫌歸去晚忙
官偏向病中間山間此日餘初服海上何時問大還劔氣
未須勞物色占星知己聚吳關

辛巳冬以清丈祇役阡陌間晚止香山寺感而賦此

胡士鰲

忽漫登山興轉長半山雲木鬱蒼蒼花開紅茗春猶豔雪
放寒梅晚更香卻訝殿臺餘蔓草可堪阡陌對斜陽披圖
未煖禪門席總爲分憂到處忙

君山放歌

郝敬

客有畫山贈我者畫出君山江之野謂我狂歌似楚人慷

江陰縣志

卷二十七

藝文詩

六十九

慨爲問春申君此山舊是君封邑山色猶疑君在日楚客
登臨憶楚山丹青畫出請君看我笑不言心自語世事何
勞更僕數昔我飄零臥空谷一朝天子開黃屋十年淪落
老江干白首空嗟行路難百歲如今已強半五十無聞吾
豈歎由來富貴水東流貽謀何必定封侯笑君祕計託紅
粉竊國無成身已芻三千珠履安在哉章華寥落祇空臺
只今黃山與黃水冒君之名亦應悔願將此山與君分山
上我題詩山下君埋墳滄桑異日有升沈我詩君骨總灰
塵千秋萬歲後誰辨我與君

獨坐江陰署中

謝豹凋殘清晝遲薰風入戶幕垂垂香生銅博門啼鳥酒
盡金尊花落枝晴雨難同人意變馬牛空負主恩知吏情
自覺纓冠懶惟有瀛洲與夢期

雜興

一壺香送杖頭春忙裏青山客裏身來爲看山山是主好
催花鳥歎遊人

竹裏桃花開滿枝牆頭春草蔓青絲高田流水低田滿正
是莊家二月時

訪張邦粹滄洲社諸子同集 何 白

十年重歎故人扉且就桐陰一解衣酒貰杜橋雲液細魚

江陰縣志

卷二十七

藝文詩

七十

烹申港雪腴肥國中屬和新知滿江上看山舊侶稀醉向
北窗堪信宿何煩畱客賦無歸

五日郝仲輿使君招飲君山

茂宰登臨復在茲憑高懷古一題詩樵蘇不禁春申墓蘋
藻惟羞季子祠帆外天垂吳岫小鏡中鳥去楚江遲昌陽
九節猶堪泛續命何煩繫五絲

追輓邑侯鶴洲錢公

王之鼎

當年仗節死江皋耿耿精忠貫斗杓報國獨憐肝膽竭嬰
城無奈犬羊驕魂迷故國三湘雨怒激巫門八月潮灑淚
尚瞻遺廟在丹青剝落樹蕭蕭

烈女祠

廟倚荒城獨對湖至今清節映冰壺時人莫認雲鬢女千
載鬚眉烈丈夫

贈邱念先時梓澄江詩選

許學夷

延陵觀樂開土風作者紛紛難具數下從勝國歷王朝
見文章散林莽遺編草草二十四苔石老人差可覩元繆鑑號

苔石遺稿二十四篇名效輦集牆東零落復何求元陸文圭牆東類稿多散失牘有梧

溪氣蒼古元王逢有梧溪集百年文質誰當備一代彬彬實吾祖

予八世從祖浮休奇變擬元和力挽昌黎追步武薛章憲號浮休

有鴻泥中間搢紳亦不乏矯矯孫張自為伍孫作有滄螺集張宣有青

江陰縣志

卷二十七

藝文詩

七十一

暘蘭堂更有不羈才搖筆千言忽傾吐卞榮有蘭堂集邱生崛起

雄且豪淋漓片楮翻波濤驂騑獨奮千里足秋鷹特出霜

崖高長千數載遁踪跡酒徒詞客同遊遨風塵骯髒少知

已但思痛飲歌離騷歸來卜築開荒徑竹樹溪流相掩映

一龕聊借半禪名花落鶯啼方出定殘編滿案時刪述盡

掃浮華歸雅正江鄉文獻待君傳千古風騷此其盛慚予

廿載探詩源世人抵掌爭笑喧已知他日當覆瓿且將什

襲藏林園陽春有調歌偏苦下里翻能混聾瞽試從今日

訪知音盡棄黃鐘鳴瓦釜

甲邑侯鶴洲錢公

陰風捲地黃雲昏鯨鯢沸江江水渾千林膏血清野草旄
頭夜夜懸空村孤城逼側安可守纍纍老稚來趨奔我侯
揮涕仰天泣煙燄萬室驚心魂公不忍倭寇焚戮之慘遂決意出戰提戈躍

馬開郭門島夷出沒如雲屯疲兵千百散榛莽蕭蕭匹馬

旋荒墩公戰死磨盤墩須臾賊幟齊揮霍萬刃攢飛矢交落忠魂

閃閃化雷霆噴雨呼風晝相薄公戰死時雷電風雨大作我侯愛民

痛侯湯湯血淚成川流殺身報國總無愧睢陽萬姓冤魂

愁六十年來事多別父老傷心忍能說淒涼古廟滿蓬蒿

豚栅雞棲相對列君不見治中張公有廟君山陽頽基亦

復升牛羊誰能配作雙忠廟勁節清風萬古揚君山有同知張公祠

江陰縣志

卷二十七

藝文詩

七十二

今廢先輩嘗議欲移錢公廟配之

遊石灣

章台鉉

灣灣絕壁盡空姿仄磴難安一酒卮捉月欲呼供奉飲驚
人恨乏謝公詩漫誇濟勝還羸健擬賦遊仙亦未遲遠望
三山都在眼肯教塵骨苦支離

澄江雜詠

尹嘉賓

延陵墓上金鈎樹結子殷勤爲酒徒墓在申浦其樹相傳爲春秋時物結子如

鉎可以醒酒十字碑傳夫子跡誰云歷聘不遊吳

前湖何氏七娘子罵賊不污殉節死湖面鴛鴦不敢遊湖

中蓮花無並頭

城中古刹誰最古迎福寺作唐初年殿梁中斷壁奇絕僧
寫經筆開冰蓮

芙蓉城與朝霞麗蘋藻風生遠渚香詩句猶傳李嘉祐循
良惟祀趙麟陽

文襄撫吳廿四載吾鄉水利最心勞兩閘輪開鐵掃帚河
工不費一絲毫

烈烈神君錢鶴洲親提驕卒出城頭城完身死應無恨化
碧常含草木愁

君山雜詠

杏花澹澹柳絲絲畫舸春江聽雨時潮捲鶴洲江色紫沙

江陰縣志

卷二十七

藝文詩

七十三

鷗睡著不曾知

河豚雪後春還淺刀鱗風來水已波攜酒江邊吹笛坐那
山今日出雲多

昆山讀書圖爲夏茂卿題

董其昌

昆山把酒和陶詩千載柴桑是爾師敢道柴桑輸一著出
山何似在山時

送錢用父令江陰

湯顯祖

新拋浮玉共朝參章服籠身百事堪一騎到江乘夜色雙
旌迎路擁朝嵐時非季子空摹碣客過春申肯罷談最好
鄉關連震澤含山煙雨正東南

贈袁晞我中丞

陳三綱

一從投劾出閩關萬里冥鴻不可攀
白簡幾曾飛北闕蒼生遙望起東山
豐函夜燭雙龍氣海國峰孤百折顏
當事憑誰匡世難長城須詔舊臣還

同楊子懋登君山

李西白

出郭重探路自分暑殘枝上葉先聞
半空帆影高翻日兩岸江潮細疊雲
晚樹有聲歸倦鳥古碑無字冷斜曛
微酣倚石呼黃歇何事青山獨屬君

過郁元禎君山北園

陳繼儒

性不近城市移居就北山及肩新種
樹濯足舊疏灣釣月

江陰縣志

卷二十七

藝文詩

七十四

漁爲伴借書僧送還秫田耕漸熟莫
放酒瓢閒

閱許伯清所輯倭變時事有感

趙繹熙

幾多廟貌似桐鄉未必遺思去後長
沒世不忘慈父母荒

庭頽宇寄烝嘗

錢公
錚

力捍孤城氣獨雄一時忠勇讓曹公
功成纔識奇男子出

沒風塵下吏中

曹公
廷慧

投戈鼠竄亦編氓何自甘心獨殺身
不有野人修野史誰

知廝役是忠臣

楊成
陳裕

入檻

繆昌期

嘗讀膺滂傳潸然涕不禁而今車檻
裏始悟夙根深一死

無餘事三朝未報心南枝應北指視我實園陰

示兒

諸兒初了了長大竟無成往事渾如夢遺經累後生覆巢
奚有卯刈草豈畱萌幸得收吾骨還須隱姓名

寄繆采星

李應昇

士當貧賤時俯仰願易足一溪可垂釣環堵數竿竹負郭
百畝田妻子飽饘粥良朋挈壺過清月枕書讀及其志已
盈望奢天地仲恥言忠厚名喜逐澆漓俗回視昔年人邈
若山與谷嗟哉止足難古道不可復

赴逮

江陰縣志

卷二十七

藝文詩

七十五

已作冥鴻計誰知是僇民雷霆驚下土風雨泣孤臣憂患
思賢聖艱難累老親生還何敢望解網頌皇仁
聖聽方虛己愚衷敢瀝丹慙無一字補空復數行彈臣罪
應難赦君恩本自寬淒淒楊柳色誰爲問南冠

劉伶巷

陳函煇

有酒聊相頌知君恥獨醒回車經古巷荷鍤弔沈冥死豈
人埋得言猶婦可聽二豪堪一映螺贏與螟蛉

杜康橋

酒人千載上姓字此中畱不賴君遺教其誰可解憂公田
饒秫國吏隱有槽邱寂寂荒江外浮生聊與謀

陟綺山品善利泉

毛晉

嘗行綺山下今陟綺山巔西風吹我衣江天橫秋煙踞彼
虎礪石蔓草苦纏綿昔日貔貅士誰拜君王前嵯峨不改
色旁有樵夫眠樵夫導前路告我善利泉爰出亂石中盈
盈復涓涓野花不知名載路各爲妍采采盈一掬使我心
怡然

題小香山梅花堂詩和雷門兄韻

徐宏祖

予兄雷門結廬種梅於小香山山以吳妃採香名也堂
顏爲坡仙筆坡仙愛梅花以名堂予兄借坡筆以酬梅
堂後削石爲壁剗石爲池面石爲軒月隱崖端則暗香

江陰縣志

卷二十七

藝文詩

七十六

浮動風生波面則泛玉參差堂前憑空攬翠岫樹江雲
羅列獻奇帆影尊前墟煙鏡裏陰晴之態互殊晨夕之
觀迴別予來時倏雨倏晴予兄課僕移竹前村乘月種
之中夜寒甚各擁褥浮白而觀觴政鉅聲互相磊落孤
山韻裏羅浮夢中未見此豪致也予與兄同有山癖行
吟之餘忘其蕪鄙敬列如左以當蛙鼓云

結廬當遙岑愛此山境寂展開明月光幻作流霞壁壁上
疊梅花壁下飛香雪冷然小有天洵矣眾香國香畱妃子
名花灑名賢筆名以還山靈筆以表山骨幽人外物緣今
古妙脗合造化己在手香色俱陳迹相對兩忘言寒光凌

太乙

賦得孤雲獨往還贈徐霞客

黃道周

笠澤無停棹杖頭不繫雲帆隨風意致山與夢氤氳古洞
扃幽戶殘厓倒暮曛每逢巢鳥盡蘿月想繽紛

何處不仙嶠長游已大還猿魚新換徑虎豹久迷關天縱
幾人逸生扶半世間楞伽言語外別寄與誰刪

雨窗夜坐

周之望

子夜孤燈坐寂寥暗風吹雨欲終宵傷心未了三生夢撫
掌徒懸四壁瓢楚漢殘編空戰壘江山遺譜只漁樵早知
燕市千金骨不換陶家五柳腰

江陰縣志

卷二十七

藝文詩

七十七

登君山

一髻青螺一岫雲應須劈破與平分當年楚水流何處那
得吳山尚屬君

顧山山茶歌

黃毓祺

顧山寺裏山茶樹種之何年不記數或云此樹昭明遺故
老相傳豈無據在昔盛時花滿樓上下屈錯枝相膠上枝
重重覆青蓋下枝落落蟠蒼虬旣云昭明手所種千秋萬
歲當來遊野夫平日好奇古探奇訪古樓上頭樓頭先有
昭明過再拜向我請我歌我今扶病偶來此病筆其奈山
茶何卻憶武侯廟前柏柯如青銅節如石古來材大難爲

用杜陵見之重歎息更憶吾祖古杏詩雷燒雨蝕猶崛奇
入火不爇水不濡樹木乃與至人俱吁嗟山茶亦如此孫
枝不共本枝死昭明昭明爾有知鬼守神呵供役使不然
空有顧山山茶名吾不得而見之矣

江上九子歌

岷峨嶓冢大如斗瀉出長江濁如酒其下乃是馮夷居天
吳九首形崛奇枯魚悲泣老鼉笑蛟人亂舞龍子飛白石
何磊磊幻出君山一卷耳中有一男子自稱黃介子天荒
地老無人識落魄蹉跎心不死有弟有弟同心期名毓初
字錫余
伯氏吹埴兮仲氏吹簾白日相對兮忽不怡拔劍起舞長

江陰縣志

卷二十七

藝文 詩

七十八

吁唏吁唏亦何爲感彼嚶鳴詩嚶鳴求友心孔亟友生友
生不可得十五得袁三名一驊
字季閑袁三束脩士不見竇從紛名
時
後塵道旁誰識袁公子噫嘻濁世乃有此二十得徐郎

進字
元修

徐郎慷慨烈士腸烈士肝膽鐵一片安能逐彼白衣

黃狗須臾面酒酣向我及此曹頭髮上指顏色變又有少
年美芝宇草草相逢兩相許憶昔四明有客字季眞嘗呼
白也謫仙人周郎名有士
字克九亦嘗歎我不復世中人十千斗
酒不厭頻定交周郎未云久復得卿家一小友名之望
字涼武酒
不多入脣言不多出口筆落風雨相呵驟天生才華如此
哉豈同凡骨肉飛走郭先生善戲謔名繼清
字明卿四十友正平

北海大不惡貢六郎

名隆教
字敷五

容止清且揚何郎傅粉荀令

香魄俄酒態如嵇康繆生佯狂世所笑

名尊素
字太質

粗服亂頭

無不妙嗅酒氣以長吁面青天而大叫我輩豈是山澤癯

我輩豈是高陽徒或笑或哭或歌舞一斗英雄血欲吐男

兒有身七尺強誓將區區報明主爾來天子坐深宮廟算

豈不資股肱丞相兢兢伴食一何苦諸曹紛紛彈射一何

怒嗚呼萬里長安在天上杞人憂天天無恙一曲狂歌江

水頭大江湯湯日夜流

村寓

顧影真成踏雪鴻蕭然指爪任西東由來此世皆羈旅豈

江陰縣志

卷二十七

藝文詩

七十九

獨今朝是寓公細雨角巾思有道薄田秫米愧無功相過

幸勿譚時事兩耳曾經一喝聾

村寓用晞兒韻

無情草色爲誰萎淪落歸來一短藜春水自流茅舍外夕

陽猶在石橋西早衰有質同蒲柳舊學無心付棗梨寄語

兒曹休似我五更風雨聽雞啼

細柳新蒲色共萎閉門危坐敢扶藜可憐多病人偏老一

似驚風日易西饑口未忘雲澤米枯腸空記鄭州梨星稀

月白飛三匝烏鵲無枝也自啼

甲申紀事

白水朝來應赤符，攀龍附鳳盡魁梧。
傳聞舊輔收東郡，想像遺民拜鼎湖。
羣盜淹留秦月冷，前鋒辛苦漢軍孤。
時來裂土誇身手，精銳摧堅定有無。
刺鎮將之怯，賊持兩端也。

四起黃雲暗戍樓，憑南北望淚交流。
積屍原野飢烏集，失主沙場病馬愁。
牛李當年如異國，石尤今日正同舟。
細思喪亂因公等，珍重金陵古帝州。
憤馬左諸臣之構難，速亡也。

乙酉紀事

五更吹角夜吹笳，無復秦淮舊酒家。
小雪今朝仍李實，嚴霜昨夜尙荷花。
漁陽世事唐天寶，江左人心晉永嘉。
太息乾坤皆反覆，敢云吾道故龍蛇。

江陰縣志

卷二十七

藝文詩

八十

次友人韻

悠然物外久聲銷，舟子徒煩舉手招。
明月空潭真似鏡，長松小閣舊名蕭。
庵僧解打禾山鼓，座客能吹赤壁簫。
況有西疇堪寄傲，我來剛及麥齊腰。

冬至日口占

日行南至轉無聊，滿眼香從甚處消。
囚服自知慙管仲，紙錢誰爲祭皋陶。
愁隨弱線偏增長，淚滴寒灰亦動搖。
萬死孤臣空有夢，雁書不到御床遙。

友人爲予治木口占博笑

七尺昂藏亦幻形，頭顱不敢負朝廷。
鳶烏應怪丹心苦，螻

蟻何嫌碧血腥豈必達摩留隻履底須普化振空鈴桐棺
三寸人間世寒食荒郊草自青

望君山二首思親也

徐時進

春風猶記舞衣斑暫借圖書白晝閒最是酒醒人靜後夢
魂無夜不君山

杜鵑何處血流殷細逐溪聲斷續間雙袖數行游子淚好
憑流水到君山

臨難題壁

戚勳

血酒危亡地心安烈燄餘朝來牆上日應見數行書

弔黃子聲

於壽格

江陰縣志

卷二十七

藝文詩

八十一

澄江多遺民黃君乃其一狂是我輩狂詩文更無匹窮是
千古窮鉗首加桎梏漆燈不照形麻衣不掩膝溘先朝露
傾冥漠理難測徘徊白楊根秋風響淅瀝

夏日村居

徐遵湯

山莊無結構獨樹正當門插柳爲田界編蘆記水痕數家
常共井一姓自名村不識官何物安知野老尊

輓同社陳旦生卽次其絕筆韻

霜飈欲下樹知秋白馬青山負壯遊人在閻浮誰久住天
於慧業每先收金刀斫石山俱痛玉斧刪枝月自愁象罔
明珠何處失鮫人有淚血長流

此身吟

此身早已付滄桑
火井平分雪瀑涼
鷗浪欲飛俱碧血
鳩巢未毀卽靈光
人纏竹素三生障
天怒薇歌一老狂
雖到百年猶過客
總將傀儡弄彭殤

漫園雜詠

曹玘

紅蓼風微動
白萍溪邊猶少一
茅亭平生愛酒腸
難冷盡
日看山眼自青乍
向月中彈鐵撥
懶於燈下讀黃庭
渭城若有能歌者
擊筑高吟和爾聽

題舅氏徐仲昭借香室

盤谷當年笑語深
隔鄰寒玉締同心
買山未必成高士
借

江陰縣志

卷二十七

藝文詩

八十二

樹何須到上林
四壁有琴疎影動
中宵聞笛暗香侵
離披盡向南枝發
爲與幽人抱膝吟

久雪初霽登君山

曹玘

著屣來登似泛槎
春暉雖淺亦韶華
風帆破浪翻成雪
野草連雲半是花
河北弄兵酣虎帳
兩淮銷骨勝龍沙
目橫千里悲何極
貰酒先消一畫叉

杜康墓

蘆荻蕭蕭古渡風
冷煙微雨下輕鴻
清流萬斛甘如釀
日在先生一枕中

兩岸清山壓樹低
墓門疎雨草淒淒
關情只有橫橋柳一

遇春風綠滿溪

定山山居

張印頂

幽居自岑寂茅屋槿爲屏山定人誰定雲停我亦停卷書
容我老樽酒笑人醒莫問滄桑事吟懷入杳冥

甲辰元旦

椒花獻頌亦諛言何似梅花發自然安靜求爲泥塑佛康
強卽是地行仙虎皮踞坐惟談易塵尾橫揮盡解禪所願
頂門舒一目莫教鵠白混烏元

烏龍潭

消受煙波與月明一春詩夢水俱清花開花落去來蝶柳

江陰縣志

卷二十七

藝文詩

八十三

暗柳明朝暮鶯牧馬人歸夕陽影報鐘僧打過潭聲莫愁
覓渡無蘭槳桃葉東風久斷情
來時梅雪正霏霏纔見紅肥又綠肥柳陌枉鋪春後絮蘿
垣俱著夏初衣鷗唯空闊無他戀燕亦炎涼別處飛猶幸
杜鵑聲未喚王孫雖倦不思歸

定山山居

黃覺

曲徑危橋小結村梅花成列竹生孫祇嫌地僻無書借還
恨詩成少客論安得湖山時促席不妨風雨夜開尊今年
港水如河闊但駕扁舟直到門

江陰縣志卷之二十七終

